

緣督廬日記抄

緣督廬日記鈔卷五

光緒戊子至
己丑凡二年

長洲葉昌熾著

邑張學正素烈輯

戊子正月

元旦客來賀節皆拒未見獨坐訟過行年四十而蹉跎玩愒百
事無成愧何如之

初二日讀梅村贈陸生詩古來權要嗜奔走巧借高賢謝多口
古來貧賤難自持一餐誤喪平生守其言可謂沈痛

初五日得渭漁書知潮州府志將議開辦其意欲余圖此一席
故人之意良厚余倦游矣雖有精餌不上竿矣

初十日作齊魯近正錄序代卽亭也

十二日翰臣招游半塘先至彭園次游陳園水木明瑟亭館玲
瓏此間勝區也潘氏海山仙館卽在彭園對岸歌榭舞臺鞠

記五
為茂草惟存荔子數百樹為園丁利藪俯仰陳迹不勝滄桑
之感歸舟復至花地畧一徘徊即返棹同游者鄒子建東展
子子湛異子問潮皆同鄉也

十三日讀梅村詩以自遣故君故國之感溢乎言表昔人以桃
花夫人為況得其平矣

十九日讀元城語錄題左朝散郎主管江州太平觀賜緋魚袋
馬永卿編後學文林郎魏縣知縣區龍禎重校梓魏縣儒學
教諭王惟新同校

廿三日題華遷秋畫二絕師許所屬也

二月

初五日讀牧齋投筆詩以此欺天下後世亦不自諒矣梅村洵
不可及

初九日得妃懷書知操葺遺文業已編定約百餘首送王學使
刻入經解續編又云革卿聘其孤女為子婦叔壬居憂長齋
奉佛益不預世事

初十日學使赴肇慶按試諸君皆素筆以隨僕倦游矣請於學
使得遂言旋之願自今以後當杜門謝客願為溝中瘠不願
仰此等人眉睫也

十二日薄暮偕韓丈造撫署辭行中丞見貽唐經幢十餘種王
勝之孝廉見貽彝器拓本數十種尹伯淵贈冒巢民書畫研
拓本研背刻陳老蓮所繪巢民小像南皮所藏也中丞見示
玉造象一龕劉達夫妻為其女磨子造

十七日午後中丞派克虜小火船送至黃埔登廣利輪船
十九日夜展輪

二十日巳刻到香港聞夷人征煙稅譏察甚嚴因不登岸

廿一日夜戌時開出口

廿五日早晨過甯波酉時抵上海住天保棧

廿七日金玉山招復新園即託其僱一舟席散下船

廿八日早晨開船

三月

初一日午刻抵里

初八日至叔壬家暢談哭操戮之靈既慟故人又自幸其得歸也

初十日許勉夫來談方輯蔡氏月令將為疏證暮香生來云新得宋刻殘本酉陽雜俎又顧刻漢隸字源屬撰札記

十二日夜讀蘇詩宋高邱所刻施元之注為邵青門刪補全非

吳興真面安得宋本復出重刊行之

十三日為香生校漢隸字源先以陸子傳影宋本校毛本陸本
後有題字云嘉靖壬子十一月陸師道手錄奉衡山老先生
賜覽碩宋樓物也

十四日見說兒所作君子遠庖廚論虛字尚無扞格而說理不
甚明造叔彥齋見所作禮服釋疑稿又欲撰經儒法則編斷
自孔子世家始次仲尼弟子列傳次孟荀列傳漢以下經師
嘉言懿行無不登焉又見婁縣張錫恭聞遠所著讀士禮注
疏日記

十五日夜讀蘇詩校漢隸字源盡上平聲五支

十六日校字源六脂

十七日燈下作釋鐘一首以說文豆部彘字為禮器金部鍾字

為青鑑與段君之說不合

十八日得詩孫文書知粵中無日不雨子樞罷定畢後決計言旋又得芍溪函寄贈風峪石經二紙又知余好古泉欲得大歷建中孝建四銖諸異品拓本

十九日從康吉借張緯餘仰蕭樓文集讀之緯餘名星鑑老於學幕在皖中殷侍郎幕時為同幕楊建昭作傳後繫以論曰余客他鄉時時作一死境觀蓋所遇之人無一可以寄死生者不作死境更不得生也甚矣依人之難也其言沈痛非閱歷有得者不能言也吾思操數能無實涕

二十日至漢貞閣攜歸靜明勸化邑義垣周等造象銘其石在登封縣後周天保八年造又隋宋文彪等造澧水石橋碑在南和縣孫氏皆著錄又造綠澗堂見陳文恭刻傳家集索直

十二元為周師作輓聯其詞曰杖履溯平生豈堪粵嶠歸來
正值師門悲薤露絃歌留遺愛不僅秦郵多士相從橫舍莫
椒漿

廿一日印若得蔣仰韓處拓本二紙見貽一為明永昌衛指揮
使司夜巡牌一唐鏡上刻七絕一首曰月樣圓圓水樣清好
將香閣伴吟身青鸞不用羞孤影開匣當如見故人

廿三日唐仁齋來見示宋乾德重修中岳廟記駱文蔚書

廿五日唐仁齋送來晉漂陽侯史公廟碑永和八年十三代孫
甯朔將軍中郎將援重立諸家金石從未著錄據仁齋云錫
山秦萱風先生至溧陽史氏祠中訪得之余審其文不似東
晉人所為字亦平近甚可疑也又魏武定八年穆子容脩太
公廟碑魏皇甫驎墓志徂徠山摩崖佛經宋元祐黨人碑各

一通黨人碑有二石一在融縣者額正書一在臨桂者額隸書此臨桂本也

廿八日感著告余云貧士能耐貧頤指氣使則不耐也真知我三十日昨從漢貞閣攜歸太僕卿元公及夫人姬氏墓志石唐邨題字今日新吾以唐開業寺碑解慧寺門樓贊見貽

四月

初二日至漢貞閣攜歸唐墓志數種一為尼清真塔銘沙門季良撰一為朝議郎行尚書祠部員外郎裴君墓志銘族叔禮部員外郎肱撰兼書一為大慈恩寺大法師甚公塔銘朝散大夫檢校太子左庶子使持節金州諸軍事守金州刺史兼御史中丞輕車都尉賜紫金魚袋李弘慶撰一為試大理司直辛公墓誌銘姑射處士睦口撰一為朝議郎前行宣州南

陵縣尉柱國張府君墓誌銘朝議郎前使持節藤州諸軍事
前守藤州刺史上柱國賜緋魚袋蔡德章撰

初三日得此懷書見貽隋元公及姪夫人墓志仁齋不復能居
奇矣又得詩孫丈書云憲齋新設通志采訪局欲以金石見
屬如憲公之開誠布公非不願往也奈夫已氏何

初四日西園師招飲庭中佛香盛開此花一名婆羅來自西域
齋戒而後可種加以不潔之物頃刻可萎西園師又言江陰
吳冠英丈夫婦八十齋眉一老妾年六七十餘貧病交迫至
自憾不早逝名士下場頭可為浩歎

十一日得芍溪書以江陰吳冠英丈夫所藏心經幢拓本見贈此
幢造於開元廿八年四月張晏撰序書人名已泐舊聞之唐
仁齋云六舟和尚舊物芍翁述冠老之言云得之江陰敗廟

中非得自六舟也又云冠老龍鍾無心於此欲舉以相贈苟翁以為暨陽故物堅拒未納

十二日訪許勉夫居委巷之中陋室一椽課蒙童四五自給出示趙凡夫皇明世典稿本佚存五十餘冊面葉題字皆凡夫先生手筆每葉板心寒山草三篆字亦其書也凡例已刻據所述分徵應編創業編垂統編然徵應編首卷又題十之一則似不僅此三類全書尚未分卷攷此書郡志不著錄惟寒山志凡夫自敘云皇明世典中三重事一靖難二復辟三大禮筆不能題淚不堪灑人生至此幾不欲生收攬前後作者並存不削亦不言其體例如何明人撰述陵雜無序往往如此勉夫云舊為查氏得樹樓所藏歸後綏之來談亦極口勉夫之刻苦非人所能及

十三日得叔朋書以許學叢書見貽共刊三集皆數見不鮮之本

十四日訪岷懷共讀探數遺文又出示趙文敏書酒德頌卷子平津館舊藏岷懷得之長沙周氏有淵如跋三則覃溪三則段若膺桂未谷皆有看款又見南田花艸卷黃小松為桂未谷畫小屏四幅王烟客畫山水尺頁九幅內有洞庭兩山圖岷懷說為希有之品又見出售書目一紙出自探數家洵美先生所校釋文集韻亦在其中見之腹痛

十五日顧庭云伯淵藏有唐石數種又有一小石幢云皆校邠師所遺然余假館靈巖時未嘗見也豈當時無心於此故熟視無覩耶

十六日訪鍾子靖見宣和畫鷹有明宣德御題又有鄭元祐張

渥題字子靖云是偽筆細審無飛動之致其言良是得此懷書以郡齋讀書志見貽王益吾祭酒校刻本也

十七日從鍾子靖處借杭州府志一部閱之乾隆四十三年原修總裁知府邵齊然總修汪沆王增邵晉涵四十九年續修總裁知府鄭湮總修邵晉涵其書體例未善攷證尤多疏舛文苑王之獻伯珍一人兩傳相隔不過二葉金石藝文皆僅錄舊文不言存佚吾不知屬稿時二雲先生曾否寓目也

十八日得碩庭書屬題歸研圖卷子伯淵來云在京曾從陳培之農部借沈小宛手校水經注傳錄香生欲借刻

廿一日從伯淵處借到石幢雍臣祚造但書大宋歲壬午而無紀年字不甚精

廿二日訪唐仁齋得射陽石門畫像攜歸瓊推自拓石修一本

廿四日得鄭盒丈書知仲午丁艱

廿五日讀申季遺稿皆書院課藝存之雖非操觚本意亦慰情聊勝無而已

廿六日此懷叔彥偕來暢談叔彥讀淩次仲校禮堂集黃鐘攷尊崇西學有西方有聖人一語憤不能平為之廢寢此懷作釋人疏證已脫稿又欲作漢碑引經攷得鳳石書屬撰劉孝子徵詩啟

廿七日訪香生與言刻漢隸字源體例格不相入因慙慙先刻論衡偶檢鈕匪石遺文有校禮堂集書後譏其操戈於宋學而以尊歐洲天算為持平與叔彥各明一義皆淩氏之諍友也

廿九日培卿丈拓得造象一區經幢兩座一下截已失僅有乾

符六年四字略可辨經文亦模糊一斷為三截有建幢記云
為亡考二郎於其墳所建立花幢又云十一月廿日記其紀
元及建幢人姓名則已佚矣撰人為義林失其姓所存字行
書頗工有懷仁聖教遺意皆憲齋文從闕中携歸者也

三十日得熙年書云有人持新野縣經幢求售會昌二年九月
僧契元書不知此包山幢也云新野者市人炫售之技耳

五月

初九日得岷懷函為余購定汪刻儀禮單疏一部直泰餅
初十日訪印若出示高澹游浮嵐暖翠畫卷

十二日在翼甫處見海昌蔣肖鰭茂才寅昉先生之子也見贈
唐朱陽墓志拓本海甯新出土文云公諱陽字正中杭州鹽
官縣人也以永貞元年九月廿四日終於此邑長平鄉之私

第以其年十月廿日寔於紫薇山世字旦字皆避諱翼甫出示新得明正德李珏刊方言從宋本出有沈辨之印吾郡故物也又明刊釋名及小字本山海經皆嘉靖以前刊本

十四日閱操數說經之文數十首

十五日林屋費晚香延芳鳳永叔恭寶來受業閱操數遺文汰十之四

十七日見曲園所作文昌生日歌據華陽國志等書攷為梓潼文姓至漢貞閣見曹恪碑諧直未成仁和吳昌綬印臣來其人天資高朗頗似江生也

十八日吳印臣偕襄陽錢仲選葆青同來前月黃方伯正誼課余得第二即其所閱方伯曾招往文宴今仲翁又辱先施意可感也方伯藏有隨李則墓志吳嚴墓志唐法澄塔銘顯聖

寺幢元善救寺幢前往謁時以古石軒讀碑命題余作記一首欲請拓本未知其允否也

二十日永宜來不見者五六年矣聆其言和平肫摯如飲醇醪平生第一益友也

廿三日為叔朋作許學叢書序丁永之來云在京曾見趙撫叔所藏書皆祕冊也今所刊叢書四集猶非其至者又云新有人自延閣抄一統志足本將付石印

廿四日純卿來云藏有吳項儒遺集寫本又云新為姚彥侍方伯排印北堂書鈔

廿五日作武昌劉孝子徵詩啟為鳳石捉刀

廿九日得鳳石函送來士禮居分題咸宜女郎詩冊彙編一冊屬代撰一跋此余所欲見而未得者發函細視驩喜贊歎其

首周雲巖笠繪元機詩思圖陳曼生跋云吳江陸蘭塘英所
畫十二女史圖中有此本菟翁屬雲巖重摹以弁其集庚午
秋八月錢唐陳鴻壽題記圖後一葉黃同叔篆書同人分題
咸宜女郎詩冊彙編十二字後署乙卯七月壽鳳書其中又
有海虞胡芭香所寫菟翁鏡中影同叔所摹銅鏡及生來瘦
螭鈕印菟翁自作詩文及同叔兄弟詩同人題詩近人所作
詩詞備錄於後

道光乙酉新秋七月七日風兒邀集同人縣橋小隱學耕堂
為吟社第三集是集吟課丐題宋廬所藏唐女郎魚元機詩
集不限體韻各盡所長其必以魚集者蓋嘉慶癸亥春始得
是集及仲夏下泮三日邀同人題之共得十二人一時傳為
佳話越三日風兒始生及長稍解聲韻頗好吟詠因舉是集

昇之俾世守宋廬百一之珍且物與人皆來自癸亥又成一
奇遇也今年已二十三矣雖制舉之學不工一衿亦未幸獲
而喜與勝已者游前此黃文節公生日會於儀宋堂荷華生
日立秋會於小茭蘆館今七月七日又會於縣橋小隱皆一
時知命之士善道德而能文章者吾子能往從之游非老人
之一快乎是為記其緣起老菟

與會同人姓氏列後

尤崧鎮榕疇	陸損之東麓	彭蘊章詠義	朱綬酉生
陳彬華小松	吳嘉淦清如	褚達椿仙根	孫義墨子和
沈秉鈺式如	潘曾沂功甫	吳根壽雲	李一鳳苞之
黃壽鳳同叔	黃美鑄飲魚		

七月七日重讀魚集一過撫今追昔情緒蒼茫不覺詩思之

填膺也然時苦氣逆不順未能構思因集集中句成七絕八
首每首各注所指聊以自怡云爾

河漢期賒空極目夢為蝴蝶也每花開乘畫舫吟明月不羨

牽牛織女家

其一 七月七日 次集同人題評

今朝北雁又南飛無限荷香染暑衣疎散未閑終遂願博香

轡暖麝香微

其二 吟社始於六月十二再會於六月廿四今會已入新秋數日矣

僻巷深居謬學顏忽將瓊韻叩柴關多情公子春留句獨自

清吟月色閒

其三 是會潘功甫未及入會而先有詩詩成在七月我生明日

坐上新泉泛酒杯綺羅長擁亂書堆井邊桐葉鳴秋雨移得

仙居此地來

其四 近沈詩雲有唐東三婦人集之刻皆出自予家而無集以宋刊故獨登百宋一塵賦

珍翠新鋪翡翠樓紅旖開處見銀鈎布衣終作雲霄客且惜

時吟在白頭

其五 前會如南雁惠香渠以及木夫竹友今皆為京外官

柳絲梅綻正芳菲比翼連襟會肯遲聚散已悲雲不定不堪

吟苦寂寥時其六前會如善階前堂

自歎多情是足愁片時已過十經秋如松匪石盟長在夜夜

燈前欲白頭其七此册所賦錦囊用洞庭山人鍾匪石所

反無雙字

嶰谷風吹萬葉秋晚風歌柳似眉愁欲將香匣收藏却却恐

相將不到頭其八吾家百宋一塵中物按圖索驥為一

一之珍也子孫其世守之勿為豪家所奪

七月七日晨起坐百宋一塵之北牕苑夫書

此上石章下銅鏡二者皆得諸顧子鑑泉初予欲購一長方

印鑑泉因取紅黃壽山石章相示質頗佳上有辟邪鈕惜已

鐫成文曰生來瘦子雖不適用然篆出於喬昱手物以人重

留之以為文玩可矣至於銅鏡本非所須鑑泉云是青銅鏡
鑑之可見真面目亦遂留之時予有琴川之行蓋為往弔陳
君子準也初一出門初三歸家三晝夜中勞頓傷感疲憊已
極偶憩滂喜園中適有西城舊人過予門曰主翁今年七十
五歲耶予甚異其言急問鏡曾磨否兒輩應曰磨矣取而鑒
之形神瘦削頓改舊容噫一生之肥瘠亦何關於人事而必
有石章以為先機之示兆又有銅鏡以為對面之參觀始知
一動一靜悉本天然矣或詰之曰子此行才三日耳有詩若
千首得毋苦吟而瘦乎予曰瘦有精神何以肥為且曰生來
瘦則瘦者生來之機也予今年勵六十三歲耳而外人以為
七十五此一紀之壽天假我以年矣夫何憂道光乙酉七月
七日復翁記

昌熾案此文在小影之上生來瘦印文之下飲齋書小楷精絕

生來瘦生來瘦我有好容顏忽焉頓改舊衰軀抱微疴胸高
苦欬瘕不道口流涎面竟觀河飲瘦却有精神清臞勝寒陋

旁人許加年七十五歲壽

菟夫

昌熾案此詩在生來瘦印之側

青銅鏡青銅鏡我有真面目見君益清淨憶自辛年來常苦
夏畦病病時多塵容顏色失其正一入新秋來精瑩得金性

寄語磨鏡郎揚輝月秋孟

菟夫

此詩在鏡中影之左二詩並飲魚所錄

七月十日病榻無聊惟以宋雕魚集展閱消閒因仍集句成
詩有詩製題前四首敍當日雅集之意兼及雅集之人題旨
在各首下後六首一敍宋塵觴詠之事一敍魚集題詞之人
餘敍舊題之人人各一詩即當懷舊之作云爾

休招閒客夜貪棋淚落晴光一首詩且醉尊前休悵望石城

城下暮帆遲

其一 座中秋賦白門者共
有八人此集即為祖我亦可

况當風月滿庭秋何事能消旅館愁莫倦蓬門時一訪願君

爭取最前籌其二 席上探花以爲諸君奪元之兆

一枝月桂和烟秀苦思搜詩燈下吟局閒朱門人不到新情

字字又聲金其三 三孫以詩獲傳游席今科居然觀場倚得御地聲金或集仰天舉桂子時作非分之想

滿庭黃菊籬邊折歷歷銀鈎指下生畢竟入門應始了舉頭

空羨榜中名其四 小松遠憂毒雲高尚皆未赴試

喧喧朱紫雜人寰白日清宵是散仙長者車音門外有春花

秋月入詩篇其五 自道宋塵然集之樂

同向銀床恨早秋堅圓靜滑一星流暫持詩句魂猶斷潘岳

多情欲白頭其六 歸佩珊夫人詞筆甚妙三松女弟子也爲予代求之

萬里身同不繫舟南雅曾任雲市學差有遮閑處任鈎留乞假後補春來

秋去相思在南北魚雁時可相通鸛鵲籠中語未休今以言事錫綬編爲散仙 其七

南雅室
藏東閣

閒居作賦幾年愁楊柳東西絆客舟

方米久已職閒今春惆
就徐氏館買舟北上

悵春風楚江暮離腸百結解無由

即使明春得第而年已及
周甲亦復何用我輩故交

不勝惜別之心其
方米遠館北行

幽棲莫定梧桐處窗下銀鐙暗晚風范蠡功成身隱遁持竿

盡日碧江空

其九
南近始歸隱錄川吳

深巷窮門少侶倚為憐鄰巷小房幽不辭宛轉長隨手雙燕

巢分白露秋

其十
從老屋建此與子同居處

六十三歲病叟書

七月十日之夜風雨大作夜眠不寐仍想集魚集句為詩然
記憶不清只好先製題以待此時光景正與魚集中滿庭木
葉愁風起一首詩來百度吟情緒合也遲明梳洗既畢佛堂

香火亦竣事遂磨墨伸紙隨卧時所製題為之寫畢益覺筆
歌墨舞神采飛動也病魔為詩魔戰勝而退矣喜而書此

鴛鴦一隻失羣飛聞道隣家夫婿歸字字朝看軒碧玉簾無

盈手泣斜暉其一 卷中先有女史曹貞秀題句有楊仙山
人同觀款今墨集已失偶而予近日又乞得昭

文林子滿夫婦題句偶使墨集見之定多傷感

忽喜扣門傳語至陽春歌在換新詞彩雲一去無消息不料

仙郎有別離其二 沈綺雲墨集夫人林婿今時雲作古需此甚難
甚精板歸松江古倪圖今時雲作古需此甚難

或向伊第十求之問有
得者 是首風兒補集

別日南鴻纔北去花叢自過不曾栽蓬山雨灑千峰小雨朵

芙蓉鏡裏開其三 詠苑功甫來歲俱上春官定看過長
安花矣蓬萊伊通笑蓉鏡下及第此二君也

茫茫九陌無知己芳意潛消又一春何事玉郎搜藻思却緣

香甚蝶難親其四 予幼子同叔及子仙今郎苞之一以壽
其四 一以一賜名今春十試俱未售不勝感兮

風令之感

煙花已入鷓鴣巷仙籍人間不久留寶匣鏡昏蟬髻亂篇篇

夜誦在衾

其五題惕甫幼子第三壻也予嘗欲再會同

病段大抵年少風流誤入烟花之隊臨死以副雅堂稿廿五冊授其繼室曹左芬左芬堅守不輟示人間近已刊行矣

叔夜佳醪莫獨斟不眠長夜怕寒衾白花發詠慚緝謝透幌

紗窗惜月沈

其六此致昨夜風雨不寐光景為總結

午後風稍息時露日光一力從山中來昨遣請展五峯蓐并

候山僧阻風而宿庵中庵僧知予病特遣道人向孫家橋蓮

蕩中撐白華蓮蓬十隻貽予剝之色香味俱備可謂知情識

趣之卒成和上矣此養病第一快事因拊書諸冊秋清逸士

手稿

是會期而未至者一人曹靖稼山也即墨琴之姪并叔之表

兄故與予三兒尤稔胸中頗多蘊蓄時作長編大文以發揮
之近應賀方伯選經濟文編之聘就館薇垣其不來者想公
事倥傯也家住城西之谿上去楓江不遠矣三兒補集一首
請正余以為甚妙因手書之時七月中元前三日

西看已有登垣意楓葉千枝須萬枝書信茫茫何處問終期
相見月圓時

此書曾為執芸主人指名相索予曰留此為娛老之資雖千
金不易也從此無有過而問焉者正所謂不用多情欲相見
滿湘夢斷罷調琴復縱一絕以足其意

珠歸龍窟知誰見翠葉那堪染露塵一曲豔歌琴杳杳王孫
方恨買無因 老菟

自織回文寄子安厭厭酒病怯春寒如何匪石盟無定零落

風光到牡丹

憐才直到光威輩願死紅顏亦太憨一事為君惆悵甚謫來
塵世未為男

書宋槧魚幼微集後時道光五年七夕次首結語即用集
中句
式如沈秉鈺

玉壇金闕夢依依仙貌長芳魚幼微詩在人間無價寶當年

空自恨羅衣

自恨羅衣掩詩句集中句也

洞房幽隙覺秋風怨李無情使淚紅為有聰明憐復損蛛絲
世態十年中

乙酉七月七日集見復齋題宋本魚元機集奉堯夫仁丈

正之

潘曾沂

乙酉七夕堯翁二丈招集宋塵居題宋槧魚元機集奉成四

絕

江邊楊柳寄相思

江邊柳是集中首題

密宇珍珠一卷詩乞得蘭陵真

宋本俊流分詠已多時

丈于於亥歲集諸名流分韻賦詩

惹心蘭質憶當年

元機一字舊蘭

珊管薰來句欲仙賦罷羅衣終有

恨空留側豔和金荃

小影姍姍入畫描霞裳雲佩寫生綃

丈屬余秋室學士寫小像于卷首又屬改君七

蘇寓小像於修幅懸於百家一處

有情縱解郎難得何忍傷心怨絲翹

金釵夜夜卜鐙花曾憶牽牛織女家

本集中

索乞得天衣無縫巧

詩翁好句自籠紗

丈集集中句先得七絕八首後又得絕句十八首

陳彬華元之呈本

仙館歲宜比館娃春風無那妬桃花莫嫌慧愛難消受贏得

才名並八義

曳月簪星絕妙詞晚唐風格擅當時幾番幽怨應題偏合倚

闌干一咏之

詩計十
二頁

麻沙繡本睦親坊百宋猶留百一藏

家君近作宋屋百一之
藏印蓋謂百宋一屋中

僅存百分
之一耳

爭說奇書抵無價得來差勝有心郎

不作時粧作道妝如花仙貌寄長芳龍眠妙筆由天補寫出

吟魂筆亦香

蕙歇蘭銷奈汝何苦相思處費吟哦座中盡是題名客只恐

羅衣惹恨多

自恨羅衣掩詩句舉語空茂榜中名
集中句也時座中諸君將應試白門

韻事重翻已廿年每從文字證因緣今朝乞得天孫巧好續

瓊題入舊編

乙酉七夕題

壽鳳呈本

曳月簪星幾度春咸宜觀裏苦吟身平生惆悵知何限惟有

羅衣恨最真

臨安坊本妙殊倫香匣收藏抵異珍底事價高人不問幾家
空恨買無因

重聯吟社連嘉賓思入清秋一倍新敢說當年李供奉題詩
端畏上頭人

乙酉七夕後三日美鎬

綺陌瑤階屬句新月明空鎖翠帷春華山亦有長眉女無那
當時入道人

斜行小本拓麻沙仙貌長芳又勝花

集中

一事更堪惆悵絕

光威姊妹是誰家

光威哀不著其姓

二詩成於乙酉夏日菟圃先生觴客士禮居以是集見示
座客皆有題句越月先生出素冊將盡錄客之所作而更

徵余婦詩余以婦詩未就亦忘錄稿而先生遽成古人矣
今春檢理舊篋適得此紙而前詩已失記復從先生哲嗣
同叔索得向所題者重書一過並命余婦綴書其右不欲
負冥諾也并記如此道光六年丙戌二月二日朱綬

深夜明星禮玉冠詩名容易滿長安風流一輩留題咏更有
當時李季蘭

侍妾中宵怨鍊師拗蓮作寸不成絲星壇香冷餘惆悵失却
金荃才子詩

元和女士高簪

黃丈菟園先生鏡中影小象為先生之元孫實甫望姑昆仲
題如先生自題絕句之數並仿其體意在懷舊言情故不復
及咸宜集也

童年曾侍丈人行滿袖常攜翰墨香觸我舉魚風木感披圖

猶記侍重堂先生數遇三松堂與先大父先君子

笑貌聲音尚宛然恍親舊雨吮毫妍國為老友胡文孫喜獲

東林壻應信良緣是夙緣近遇望岫得靈展是冊望

百宋塵西有比鄰當時情話是朱陳今朝若問羊曇淚灑向

秋風更愴神實甫持是冊來見其祖賦生余與姊夫也詢及

之

須靜當頭詠佛香玉臺班管播餘芳兒窗憶誦春陰賦早羨

名馳選士場賦生之弟飲魚余表姊婿也姊與定之工書畫

陸拜見費於周石芳學使文未終卷即蒙取錄

浴佛風光同獻佛舊游如夢好園林還憐寂寞神仙誕不見

揮毫董幼樸壬子浴佛日神仙誕日同人為協時七十同

縵謂才華綺歲工誤人意氣是豪雄稼山井叔今猶在也是

吟壇鶴髮翁

曹稼山王井叔皆先生或好高才不雅

誰將慧業證清修交到忘年總俊流筆玉前身芋火畔浮山

去路菱峯頭

題詠諸君皆先生小友彭文敬前身為筆玉僧功甫家兄自言浮渡山麓菱峯為前身涅槃處

東南劫火墮茫茫朋舊飄零每暗傷此日喜聞公有後廿年

回首隙駒忙

光緒八年壬午中秋前一日西園居士潘遵祁初稿

此外尚有尤穆時彭文敬孫子滿夫婦吳清如吳壽雲李
苞之近人如潘紱庭譜琴望之麀生諸公詩皆未錄譜琴
丈詩注云先生嘗以王忘庵紅豆花畫幅及微蘭圖卷索
先曾伯祖三松公及先大父題句麀生丈詩自注云曾見
先生與萬廉山汪澣雲袁壽階李子仙瞿木夫諸先生分

詠苑圖花木書畫冊又初建問梅詩社詩冊

昌熾附記

六月

初一日訪叔彥暢談見示欲著書目約三十餘種勇哉不可及
許氏禮鄭氏雅二種如卒業不刊之作也

初六日得香生書送來簡明目錄四冊周季貺批本又盧抱經
讀史札記一卷勞季言從嚴修能本傳錄此本又出自季言
前有勞題字云讀史札記一卷盧學士抱經之所著也先生
鍾山龍城兩記業已付梓此冊孫匪谷侍御從其稿本錄出
擬付刻而未果戊戌八月予從毋自欺齋假得嚴修能先生
校本乃手錄一副藏之他日當壽諸梨棗以公同好也已亥
蟄月朔日裝成并識後學仁和勞格後有嚴修能跋云抱經
先生生平喜校書所校不下萬卷其立意在愛惜古人啟迪

來學而於己之名望無與也故所自著書唯鍾山札記四卷
生前所刻後來又纂龍城札記未竣而殁今所刻三卷非全
書也余去歲在杭州孫頤谷侍御言先生讀史亦有札記一
冊未得付刻因以授余余屬宋君斗為錄此副本斗為即語
余校勘余受之五月餘矣因以餘閒為校一過此書非先生
經意之作然立說殊精審中有趙敬夫夾簽趙亦先生之老
友也因并附著於簡端而以書歸斗為吁知己云亡不可復
見展卷莊讀曷禁悻悻嘉慶四年己未孟夏朔後二日私淑
門人嚴元照謹記

十六日跋堯翁元機詩思圖又為鳳石作一跋

十八日訪岷懷見姚公夢云新得陳琰說文引經攷足本又云
新拓得虎邱題名較前人著錄者增宋人三種又云家藏有

嘉定井闢得熙年書贈虞山二字石刻據云椒坡丈自道州拓得寄歸

廿三日屺懷來訂明日至其家避暑即權課其子寒舍本無一席地可以靜讀因即允之

廿四日得浚民書知昨日旋贈石刻三種皆精品也

龍龜通瑞銘最難得

廿六日建霞贈唐萊州刺史德政碑一通又殘經幢一通僅存三面其一面亦不全有朝請郎守北海縣令顧口昌等題名云在山左所得

廿七日西蟲以宋井闢拓本見贈共分五面兩面刻義井二大字其餘三面最初置井之人在紹熙時一面嘉定續刻寶祐又續刻孫淵如箸錄

廿九日得芾卿書為余至奉天拓好大王碑又續得經幢可感

也

三十日到館與西蟲排比操戎遺稿

七月

初一日寫定操戎遺書目錄

初二日叔彥來談云欲著書目又添穀梁詁一種又云欲刻印章二一曰入則孝出則弟守先王之道以待後之學者一曰憂深思遠

初三日叔朋來見示所得調生宗文書目石林著述皆在焉有胡心耘所著石林燕語集辨嬾真子集證皆手稿未刻日晡查翼甫沈子封同來子封云孫遷伯藏撫州本公羊魏志單行本南宋本國語不全宋刻禮記注疏盛伯希許以千金未售遷伯熟於簿錄之學在廠肆所遇無留良焉人稱為宋板

孫杞懷云通州范當世能古文張廉卿之弟子今為薊州山
長篤於伉儷其婦歿製一行主題曰元妃孔靜夫人某氏之
神主攜之行篋雖多身重必出以奠蓋古之畸人也

初四日讀兩浙輶軒錄又從杞懷借東甌金石志閱之嘉善戴
咸弼鰲峰所輯瑞安孫仲容校補著錄三幢一在北山寺一
在陶山寺一在白鶴寺戴君之子名文佐在此間需次與杞
懷有葭莩之誼允為求拓本

初六日黃方伯見貽隋吳嚴李則墓志唐法澄塔銘顯聖寺幢
元普救寺幢又唐武邱山吏共拓本六種顯聖實為興聖之
誤余藏有舊拓本天寶五載尼決定造象文字尚完好今此
石在方伯處已裂而為二年號歲月已失去矣杞懷云抱經
堂書估陳詠和曾以精抄錢思復江月松風集求售為士禮

舊藏以直昂未得惟記其行款云每半葉十行行二十字藍格紙寫共十二卷補一卷前四卷陸子垂補輯後五首曹秋岳補輯跋錄附於後

崇禎甲戌中元練川陸嘉顯子垂揮汗簡補於吳門之西郊

草堂題崑山顧仲瑛碧梧翠竹堂

己亥仲秋四日雨窗補記題馬遠畫商山四皓圖

壬辰六月十二日揮汗簡補子垂記題錢舜舉奔山雪望圖時丙戌十月九日題

宋徽宗畫

余家藏元人真蹟有此二詩乃知江月松風集尚多遺佚思

復以書名卷冊流傳人間隨見當補入也鉅萊翁曹溶再次

長史留宿

戊子小暑前二日從玉山名勝集中抄出遇顧仲瑛可詩亭

從李氏所藏畫卷中鈔出

題息齋畫

方寸鈇詩載崑山雜咏卷二十三鉏菜翁

江月松風集為有元錢思復手書稿草先民筆墨具有別致好事家因裝裱成冊錢鑿室曹秋岳先後收藏秋岳亡後伯兄駕澁於金閨見之傾囊得歸一時爭相傳寫未免有豕魚之譌此本乃余手抄校對獨細惜有關落無從攷補至字畫間有舛誤亦從缺疑大抵古人手筆當仍其舊不可妄以己意增損也所得又有張伯淳貫酸齋書卷元人草玄閣湘竹龍倡和并雜詩束共此集為三冊得於康熙丙寅之杪春而鈔成于季秋之十三日東洞庭山又張翁栻識

下有栻翁又張南陸三朱

旁有朱字乃錄金亦陶夫子所改誤也丁卯四日栻

後又輯詩二首

題竹西居士圖為楊元誠

此首從金迂齋夫子處鈔來

新正試筆次韻清溪野史高作

從兄林表善鑒書畫多有收藏此詩乃思復手書箋紙一

幅余得觀而錄之丁卯初夏

喉有求古居
在巷尾

錢思復江月松風集余向未之見今見諸玉峯考棚汗筠齋
書籍鋪蓋太倉金元功家物也却為吾郡人手錄本翁名棧
字又張號南陔其景仰昔賢之意可見住東洞庭山則太湖
具區兩書中當必有其人惜案頭無其書不之詳然愛書如
命手澤猶新其人固可想見且為金侃亦陶之高足宜其流
風餘韻洋溢於縑緗翰墨間也余生平嗜書并嗜藏書之人

書賴人以傳人亦賴書以傳安能離而二耶此書罕有固不待言藏書之人於此僅見余故表而出之為今撰修郡志者有考焉道光癸未三月望日雨窗堯夫識

下有碧口華玉之居長方印

癸未七月廿有八日從堯夫借觀晦日往瀆川省徐氏妹午後狂風大作泊西跨塘橋下投宿談氏越日仲秋朔歸往來舟中讀堯湖山風月主人記

初八日訪沈子封略談子封云韓小亭先生收藏書籍金石晚年扁鑰不密書估李雨亭誘其子盡出而售之宋刻金石錄十卷為先生平生心賞最後亦竟失之以詢其子則云為人借閱偶失手墮井中矣先生大駭急命涸井索之不可得則曰爛為泥矣懊喪不已又云壬戌秋閏運實有霸才

初九日校操數遺書得我庾丈東村來粵電知南皮及憲齋招

即日束裝赴粵不知其何事也

初十日校標跋遺書

十二日西齋赴白下省試留示千甍亭古甃拓本四巨冊可謂富矣又示唐墓志四通一劉密墓志銘首行題唐故朝請大夫唐州長史兼監察御史彭城劉府君墓志太和六年有額一即劉公夫人崔氏墓志銘元和九年外甥鄉貢進士辛劭撰有額一梁嘉運墓志銘景龍三年額題梁君墓志四篆字陽文即在誌石之上有道光元年海豐吳子苾題記一趙公夫人夏侯氏墓誌銘開成五年鄉貢進士唐正解撰十三日閱趙樞叔所撰湧盧開詰湧盧鼻神也間詰出淮南子論鼻煙品有四曰弄酸燂豆窮極微妙十四日校標跋遺文閱郎抄憲齋簡署河東河道總督

十五日得希卿書為黃再同編修介紹招北行主其家為明歲會試計亦良得愈於南行也

廿三日 先慈吉祔之辰延羽流誦經熾即於午後釋服
廿四日憲齋文自粵赴河防新任今日過家夜招往便飯略談
知前電見招專為廣雅書局而設

廿六日得邵亭辛楣函知南皮尚書在南園舊址建十先生祠
即其中設廣雅書局網羅人士以司校勘屬即日束裝就道
廿七日訪王勝之詢以廣雅情形有微詢

廿九日發燕越二函辭南館就北聘

八月

初一日唐仁齋送來昭文梅李經幢乾符五年歲次戊戌七月
乙未十四日戊申建有句當弟子許亮姓名又有一幢奚虛

言五
已書在浙江上虞已有之矣

初二日得建霞書知在考市新得水經注王伯申校本明鈔本
姑蘇名賢小紀有半查馬氏叢書樓印又焦氏國史經籍志
首冊蔣子遵手鈔有跋又有南昌彭氏知聖道齋圖記又見
巾箱本論孟注疏每葉廿行二十三字格外後半葉上方有
論疏諸字中心記字數遇宋諱加圍據云雕印精美若為廖
氏羣玉世綵堂本則至寶矣即盱江覆本亦不失買王得羊
也

初五日訪仁齋攜歸青州刺史臨淮王碑北齊武平四年六月
在山東益都又朱道威等造丈八大象頌北齊天統三年五
月在河南許州

初六日游拙政園說兒隨往壁間有復園記沈文憲撰王峻書

此園明王御史獻臣所創國初歸海甯陳相國其後沒為軍署又嘗為督糧道署乾隆中為蔣榮誦先所得改名復園憶兵燹以前尚屬蔣姓也

初七日讀樊榭山房集

十二日校操殺遺書

十三日讀敬業堂集

十四日讀敬業堂集悔餘初館自怡園為揆愷功師其後愷功游升揆席為翰林院掌院學士悔餘尚在翰林反以師事之其先後唱和詩歷歷可考也

二十日潘瀛士來莘田丈之子為其父乞撰迎師徵詩啟

廿一日讀歸熙甫文集

廿五日得岷懷書從江陰吳冠英丈處購開元石幢見贈百朋

之錫也聞藝主公羊舊誼與鄙意合並云建霞次藝以西法
祕術詰題廣為周徑厚為地心載華嶽句為重學振河海句
為攝力奇而確得未曾有二場詩題既景廼罔三句必主形
家言此懷知而不為此為名心所制耳

廿八日西臺自白下歸云在滬遇繆筱珊聯舟赴蘇既而筱珊
亦登岸即下榻館中劇談至三鼓始睡筱珊與黃再同丙子
同年謂其有名臣氣又云豐潤已為合肥之坦腹咄咄怪事
九月

初一日新吾在白門為余購得經幢八種內三種余所有又一
種誤析為二實則四種然皆不易得一為僧文演造在新繁
一為李師簡造一唐大和中造石在憲齋處僅半截此拓猶
未斷以前本可以做憲齋矣一唐梵合體

初三日建霞來暢談以新得舊抄吳郡名賢小紀見示出自叢書樓又宋刻中箱本論語正義紙墨不古明藩府刻耳

初五日得嚴子範東贈經幢二種一常庭訓造一僧義從造皆余所已得又二幢一在沂州開元庚辰造一在潯川龍興寺皆罕見惜非金拓僅各存二三幅耳又魏司馬元興墓志張榮造造象等慈寺殘碑蔡惠振等造象

有兩

初六日得建霞書寄贈佛象幢拓本共六面魏元象元年張敬造凡分三層上刻佛象中造象人姓名下序贊筆法精整此書中之上品

初七日嚴子範來談云汝州考棚有經幢二座亦為余拓得又云曾游龍門鑿石為巨龕中有大佛象偕列小象甚多龕以上星羅棋布以千萬計皆造象也龕中有經幢兩三座橫卧

於地展閱建霞所贈幢歡喜讚歎為作二跋並請西蟲題額
初八日許勉甫來云杭州經幢已為余轉託盧樞臣茂才樞臣
名渠酷嗜金石疏狂不羈亦今之振奇人也

初九日夜取舊得金泰和元年謙公塔銘閱之前有準提佛母
真言生天真言圓樂刻如鏡形以其罕見為作一跋

十一日此懷見示續經世文編目笈珊及汪子淵同年所定原
書學術治體吏戶禮兵刑工六政之外增以洋務所采近人
文殊有不必采者學術中闕入漢學商兌序尤可駭也

十二日建霞來夜飯為言蓮秋先生所藏書畫為其甥慈溪令
鄒君以三千金購去有拓本一篋求售因屬圖之

十五日余四十初度建霞招游虎阜以病辭之午後來以旬器
拓本五十餘種為壽得之貽無量壽佛經拓本此懷貽經幢

五種一開元者最精分三層刻上咒中佛象下經序

十七日建霞得之招游虎阜在縣橋巷回真道院前下船見河
干一石刻七如來制作甚古因諦視之乃一殘幢磨去重刻
一面留佛象及數字甚清朗攷懸橋巷屬道義鄉所管吳郡
金石目有道義鄉經幢宋咸平間樹於江夏黃十五娘墓前
久已佚去必此幢矣出城至半塘橋訪壽聖寺梁龍德經幢
在大殿前幢及座已離而為二幢在左座在右座上刻佛象
尚完好幢已磨滅姑拓一紙映日視之僅一面可辨為五行
有諸道二字可識其上截亦刻七如來亦已漫漶僅存四面
然則此幢之遺損蓋已久矣既至虎阜雲巖寺建霞遍拓摩
崖題名及顯德經幢最後在五十三參之上得崇禎己卯石
幢亦為妄人磨刻七如來同日得三幢皆為七如來所損為

之惋歎不已

廿二日晨至電局探南閩信但知筱渭建霞同捷旁午人持千
佛名經來郡城自江氏昆仲外孫宗華王毓祥馬嘉楨周應
政沈維驥陳世垣陶惟坻陶治元唐繼盛共十一人黃昏知
岷懷中六十七名太倉沈子復嘉澍亦捷皆主公羊舊誼者
也

廿三日至岷懷處賀喜知儀徵劉富曾顯曾鹽城陳玉樹婁縣
張錫恭江陰沙從心皆獲雋得人可謂極盛

廿四日得建霞書附來石田山水一軸因文天爵王濟之約同
游不果而作質之西齋謂有駿骨之歎因即還之

廿五日至漢貞閣携歸沈府君神道王稚子關吹角壩摩厓嚴
武龍日寺題詩拓本四種皆蜀刻也

廿六日訪建霞見舊書十餘種云在世經堂携歸劉彥清所藏也。以明本史記為最佳。非王刻。非柯刻。亦非秦藩本。察其紙墨。總在正統以前。又明刻本蘇頌濱古史記。徐武子選杜詩。手抄本吳山尊韓晏合刻。皆精好。聞上駟皆為姚彥侍蔣香生所得矣。

廿七日黃再同編修自都門至蘇省。親來訪。未晤。得錢冠瀛書。增到白佛山造象千佛山造象。駝山造像。雲門山造象。資福寺經幢。皆山東石刻也。又靈壽縣北齊天保造像。其物並難得。而直尚不大昂。擬盡購之。又從緝庭觀察處取歸經幢。拓本一束。如牛腰。皆在秦中。為余拓得者。挑燈細檢。一過有七八種。為余所未有。良友之惠。百朋不啻也。

十月

初一日張純卿丈晨來談王益吾學使新輯江左制藝二十家

以陳玉樹為殿陳君新科中式宗師深以為快云

初二日訪唐仁齋購蘭州拓本全套中強獨樂為文皇帝造象

篋中所有其餘皆所未見也

除強獨樂造象
直洋銀四兩

羊貴造像大歷五年

孫趙未著錄

資州刺史叱干出三教道場文

大曆六年 孫氏著錄任云
青浦王氏藏本不知其在蘭

州也

程孝

□造象

無年月

未著錄

□州參軍造象

無年月

未著錄

□志□造象

無年月

未著錄

吳元德楊懷文修釋迦佛座題字

天聖六年

未著錄

石削虞猴王金造象

無年月

未著錄

宋京題周文王廟詩 壬辰仲夏 趙氏考為政和二年

劉松茂題名 元祐癸酉 未著錄

明鎬鄭驥題名 景祐五年 未著錄

□□字庶先題名 慶曆四年 未著錄

王釗題名 慶曆四年 未著錄

初三日為潘稚阜作航海迎師圖徵詩啟得吳印臣書為余覓得上虞殘幃拓本及天竺二幃

初五日西蟲出所藏趙承旨行書千文米虎兒山水手卷見示建霞携方蘭珉所畫耆年服物圖眼鏡湯婆等物無所不具殊有別趣

初七日赴黃方伯之招見智涵昆仲胡綬之章式之同席楊君言有人持潘梅生先生所校說文索價二百元人固有寂寂

於生前而身後遺書寶如球璧者彼赫赫者今何有哉

十二日得再同書定十七行作五古一首和黃方伯韻

十四日燈下理董連金石幢拓本計百餘種縣橋巷河干石幢亦由碑賈拓得一面佛象下八字曰摩訶般若波羅蜜多不成丈理筆意亦庸俗必非古時殘刻使舁歸齋中不堪噴飯矣乎

十六日夜飯後登小舟稍展棹即泊以今日宜出行故也再同船則於胥門外泊明日晚開始登舟

十七日移舟至泰伯廟橋訪曹叔彥略談登舟至胥門上再同船候至深昏再同始來

十八日天未明開船以飛雲輪船拖帶其行極速八點鐘即越崑山而過未刻至黃濱申刻到滬登岸住長發客棧再同云

方伯新在吳中得紹興本靈樞素問

十九日至醉六堂書肆見蒙古源流二冊紅格鈔本有豐山馬笏齋圖記諸直未成午後偕再同至抱芳閣書坊訪鮑叔衡未見架上皆新冊無可寓目再同在樂善堂購編刻唐石經頗精好日本人所為也

二十日閱肆購定行素堂書目一部吳牧庵遜志堂雜鈔一部邵亭詩文集一部邵叔仁劉芙初郭頻伽三家集各一部在樂善堂見日本人物茂卿徂徠集議直未果

廿一日海定船將北駛午後束裝

廿二日已刻展輪出吳淞口

廿五日黎明抵大沽水淺沙膠不能進口遂置行李於舟赴小火船登岸至塘沽搭火車候至日映方展輪抵紫竹林對岸

天已昏黑呼小舟渡河住佛照樓

廿八日候行裝不至在寓無聊午後偕再同至津城水月庵官書局所置各省官刻書甚備直亦不昂

十一月

初一日海定船吃水深不復進口行裝由興順輪船代運至埠再同遺失書一大束其餘各件俱倒錯亂甚多余行李竟無損可云萬幸薄暮即僱車首途行三十餘里宿窩口鋪

初二日五更起開車寒甚輿中擁一衾如鐵未刻至河西務尖其地梵刹甚多偕再同搜古碑無所得即行至馬頭宿庚辰偕庸甫季穎諸同年宿此已九稔矣二老見背孤兒伶仃係雖得一第將誰慰哉枕上流涕不能交睫

初三日四更起即行已刻至余家園尖聞門禁甚嚴行人不能

攜箱篋遂改裝行二十里抵都城進沙渴門至再同宅已申刻矣其子出見與說兒同年同時同日生讀左傳未畢時藝已完篇

初四日午後訪嵩隱縱談至暮而返再同見貽翁母高孺人墓碣拓本覃溪先生之祖母也即先生所書酷肖化度寺碑再同為言朱文正得宋拓化度寺碑請覃谿宋定覃谿別造一脣本歸之而留其真本文正未之覺覃谿又從而揶揄之以是文正恨刺骨覃溪晚年蹭蹬文正有以齟齬之也

初五日弔卿來携到好大王碑及經幢拓本十種可感可佩好大王碑不如鄭盒本之精據緩卿云鄭盒本用墨描畫非虛山真面也

初六日至琉廠閱肆稽古堂李姓帖賈及富華閣王某皆作古

人矣購隋唐碑十餘種返再同見示南宋拓醴泉銘及長安廟堂碑明拓顏氏家廟碑皆精

初七日開館再同招鶴巢丈及蒿隱作陪

初八日再同出示王廉生所藏石幢拓本共六面末行題字已泐其半尚可辨為乾符六年九月造筆法質厚晚唐人寫經之佳者也

初九日再同見示宋搨懷仁聖教序有王良常王夢樓姚惜抱諸先輩跋又有海鹽楊守知一跋又一明拓已斷本又一新拓本亦甚精又蘭亭叙三種一定武金龜本一類上本有程易疇跋一北雍本有薛虞卿跋又有薛松仙客生白諸印生白名雪吾吳國初時名醫與葉天士齊名者也技實精於葉

初十日再同見示隋碑六種內張通妻陶夫人墓志為余所未見筆法精整不在太僕卿元公誌之下再同又言湖南袁芳瑛漱六直隸史湘崖皆富藏書再同所得元本玉海即自袁氏散出袁藏宋元刻漢書至十餘種可謂富矣

十四日再同見示元刻困學紀聞又玉海全部亦元刊有明正德至嘉靖間修版又郢爰一枚鳳陽方孝傑所贈再同有致一首釋郢地及古銖兩之數甚詳

十五日鄭盒丈招飲並觀埃及古碑紅屋古字唐吐蕃會盟碑及日本高麗各刻同坐者希卿再同李芴農學士盛伯希祭酒王廉生王柯莊黃仲弼馮夢華太史劉佛青主事暢飲至未刻復偕再同赴廠肆購經幢五種曹艮甫墨雲閣集一部再同見示唐故滎陽鄭府君夫人博陵崔氏合祔墓誌銘并

序給事郎試太常寺奉禮郎攝衛州司法參軍秦貫纂誌云
君諱恒皇試太常寺協律郎夫人博陵崔氏以大中十二年
二月廿七日合祔有亭林覃溪兩先生及張瘦銅繼幼雲跋
附錄於後

此即今世所傳崔鶯鶯者也年七十六有女一人子六人與
鄭合葬此銘出魏縣土中足辨會真記之誣而志墓之功於
是為不細矣闕達攝提格東吳顧炎武書付族子湄

乾隆己亥秋九月十三日北平翁方綱獲觀

予己亥秋典試江甯出闈後汪君容甫持此相眎因題其後
後五年甲辰春吳門陸謹度得此以見贈物之有前定如此
二月十七日方綱記

訛又傳訛閱幾人夢中說夢定何因模糊一片滎陽石難答

他年記會真

顧跋在六十二歲然非顧手書也故云又訛

秋雨瀟瀟水閣頭汪生語倩陸郎酬昏陰簾外停雲重千里

春燈正倚樓

己亥九月汪容甫持示於秦淮驛館辛丑春與陸謹庭語及託為代訪謹庭南歸三年弗獲也

今年正月十一日謹庭自吳門微服北上乃怡於正月十日得之亦異矣二月十八日方網并識

明關西胡侍野談云近內黃野中掘得鄭恆墓志乃給事郎

秦賈撰其敘恆妻則博陵崔氏世遂以崔為鶯鶯余按會真

記雖謂鶯鶯委身於人而不著名氏鄭恆之名特見於西廂

傳奇蓋烏有之詞也世以墓志之銘偶與烏有之詞合而鄭

恆之配又偶與鶯鶯之氏同遂以墓志之崔為鶯鶯誤也况

會真記止云崔氏孀婦將歸長安不言博陵又無緣葬在內

黃且墓志之崔以大中九年正月十七日病終享年七十有

六邇其生當在德宗建中元年庚申若鶯鶯之生會真記以

言二
三十二
為甲子歲乃興元元年少庚申四歲墓志屬續之期蓋得於
鄭氏家狀會真記設悅之歲蓋得於鶯母自言並不應少誤
鄭恒之配殆別一崔氏也按顧亭林亦以是碑為鶯鶯蓋亭
林未見胡氏墅談爾亭林金石文字記又以大中十二年二
月誤作十二月斯又記載之偶失也甲辰二月十七日方綱
書

宋芝山藏一本是翻刻者中多誤字改鑿而鄭君諱遇明末
華亭張冒堂載寧跋其後云此碑出土百餘年而余與眉山
黃君恪辨之謂滎陽博陵世為婚媾何必鶯恒耶又云吾鄉
董元宰陳眉公兩先生皆未深考亦傳訛以為鶯恒語具古
文品外錄容臺集中據此則是碑於明初出土者也甲辰閏
三月朔芝山持是本來對看因併記於此

會真記言崔已委身於人諱其姓名金元人董解元王寶甫
等為西廂院本始妄撰鄭恒其人而此志明季出之內黃土
中既有鄭恒復配崔氏於是傳會西廂記之鄭恒真有其人
此與前人傳會張生為張籍者同可笑也崔張之會合在貞
元十六年明年文戰不利是十七年張籍以貞元十五年登
科是先二年非籍可知已顧亭林跋此志曰此即今世所傳
崔鶯鶯足辨會真記之誣亦夢中說夢也 石公

下有張頊
借看朱文

印方

葉九來金石錄補云孫北海侍郎說萬歷年間此志石出於
石門土中其文其書非唐人之佳者

下有又雲收
藏朱文方印

千載同符定幾人稗官附會詎無因中亭片石流傳久絕勝
崔徽自寫真

石出潘邑土中今歸
杜氏為中庭香案

點緣久斷大江頭待訪

心殷此略酬猶憶壬午秋雨夜石枰匣冷顧家樓

壬子八月
於蘇海樓

見錄笠人所藏孫北海漢
唐碑十函內有此碑覆本

己巳二月朔得翁北平藏鄭恒崔夫人合祔志比往歲所
見孫氏舊本為勝戲用翁學士韻成此寫附碑後又八歲
光緒丙子四月檢視藏碑重錄一通時右目已眇矣

曠園雜志鄭恒暨崔夫人誌在淇水西北五十里成化間淇
水橫溢土崩石出或得之鬻諸崔氏為中庭香案久之其家
有胥吏名吉者識之白於縣令邢移置邑治又傳崔氏見
夢於臨清守則尤不足信 新舊二刻並在濬邑

此刻鄭君諱作恒環奇環字尚不誤是舊搨之一證往見孫
侍郎所藏已不免如翁畢二家所識矣幼雲便紙劄記丙子

四月

十六日再同贈隋蘇慈墓志王廉生贈金洪福寺壽公法師靈塔銘隋志新出同州極似歐陽率更金幢新出福山極似蘇長公皆至精之品也

十七日再同見示舊拓玉版十三行泐縫中有覃溪題字細如黍精不可言又石刻鋪敘覃谿傳錄何義門校本

十八日再同從黃仲韜太史處携示舊拓龍藏寺碑神采奕奕為平生所見第一再同亦有一舊榻較之已損九十許字又宋刊後山全集前有紹興二年謝克家序每葉十八行行十五字疏朗悅目序後有蘇齋學士題字及詩一首錄於左
丙寅九月覃谿以任注本校看

一辨南堂古墨香較量壓架配蘇黃新津注尚開雕未紙貴誰論越與襄 吾齋蘇黃集皆宋槧本也越紙裏紙見后山

文內九月十七日晨起又題小詩方綱

十九日文琳閣帖賈以唐石經求售堅執以為明拓本索百金
廿一日貴陽羅質庵致書再同云廠肆益文堂新自閩中販書
來頗有舊籍再同約偕往觀先謁質庵至真蘇館小飲繼至
益文堂發篋陳書余僅得金石一隅錄隋唐金石拾遺安陽
金石錄三種聊以解嘲再同得明刻本說文五音韻譜有廣
平趙凡夫印內有凡夫校筆又影宋本六帖補有明沈顥朗
倩印又為朱卧庵收藏卷中所鈐老卧卧庵正氣堂印邇世
全真行已有恥在家道人皆其印也又閣帖釋文顧從義刊
本字大於錢䟽朗可喜又孫伯困刊古今姓氏書辨証平定
朔漢方略亦近刻中之精者其他朱申二禮明解坊友堅執
以為元刻初亦信其言既檢卷端有明何喬新繫銜一行定

為明刻本直昂未得又明人輯楊文靖還山稿四庫所未收
雖鱗爪至寶也初為余所得再同云其弟方輯文靖遺稿未
見此本因以讓之歸後再同又出影宋本吳淑事類賦及鈔
本書苑菁華見示書苑菁華有吳郡趙頤克家藏書印亦寒
山舊物也

廿二日訪王廉生見藏石甚多以晉太康神道宋元嘉造象為
最又見唐乾符經幢廉生云陳簠齋藏器固為天下冠即其
椎拓之精亦古今無匹能知某器宜用某紙厚薄大小無不
得宜

廿三日再同得南書知劉彥清丈所藏陸欽先校元刻郭茂倩
樂府已覓售則其書盡出矣彥清子名毓盤瞿子玖學使極
賞之非不能讀楮書者尚如此則其他又何論哉再同又見

示宋人書妙法蓮華經磁青純金銀字余以好收經幢故於
唐宋經生字軌能辨其真贋此經蒼勁盤鬱魯公嫡乳開寶
去唐不遠是以能之若宋中葉以後則不復有此筆矣首卷
前二葉畫佛象後題字三行曰信佛弟子杜遇特發志誠敬
寫金銀字妙法蓮華經一十部奉為四恩三有普及一切有
情自他同得福德智惠二種莊嚴讀誦見聞俱登佛果時開
寶六年癸酉六月十二日題次葉列妙法蓮華經弘傳序終
南山釋道宣述序下又有題字兩行云越州祥符寺比丘道
彌施財再贖受持時紹聖改元歲次甲戌仲夏日題卷末又
有朱筆數行曰直隸徽州府僧綱司都綱臣文彬欣遇聖朝
建大功德緣無報効本身有法華經一部計七卷令僧至豫
項獻西天尚師用表涓埃伏希鑒納萬幸永樂三年二月初

一日比邱文彬九拜上其餘每卷後皆有比邱文彬九拜上
七字朱色黯淡庭中映日始能辨之每卷首皆題姚秦三藏
法師鳩摩羅什奉詔譯每卷每品首行及譯經述序人題名
皆金字經中凡遇經名及佛字亦金字餘皆銀字自開寶癸
酉訖今九百餘年爛然奪目非佛力護持何以得此為之合
十讚歎不已

廿四日作宋本六帖補跋

廿五日王廉生沈子佩先後來談廉生云劉燕庭先生後式微
已極至流為乞丐子佩夢寐崔敬邕碑欲見之

廿六日訪益文堂書肆攜歸迂齋標注崇古文訣一部正德二
年廣西按察使僉事慈溪姚鏐刻於桂林有鏐自序前有寶
慶丁亥延平姚珏跋又明聞人詮一序姚跋稱廣文陳君鈺

諸梓聞人序稱王子守廬之明年刻茲文以淑郡弟子則宋
延平明廬州嘗刊本矣又前携歸張氏醫說一函前有嘉靖
癸卯張子立序稱南衡童先生按晉刻以康晉之人其書出
自宋本後附紹定改元諸萬興舊序及嘉定甲申彭方李以
制開熹丁卯江疇寶慶丁亥徐杲四跋陸慶刻本增加至十
餘卷此書十卷尚仍舊第可寶也惜索直昂終不能得耳
廿七日再同見示輦輶碑目一冊有先生手題一紙云二千二
百五十種經幢頗多有余所未得者略錄數種以備物色
陀羅尼幢天寶十一載小楷書賒齊休題

鳳縣陀羅尼幢 大曆十三年

廣福寺陀羅尼幢 元和十二年

普照寺陀羅尼幢 寶曆二年

金剛經幢 會昌二年

陀羅尼幢 大中十一年于知仁書 八面七紙

金華城南法隆寺于知仁書陀羅尼幢題名凡五紙

萬年縣陀羅尼幢 咸通二年

張阿陀羅尼幢 咸通七年

天童寺陀羅尼幢 咸通十年

瑯琊王氏夫人陀羅尼幢 乾符元年

宣武軍亳州南護國禪院陀羅尼幢 中和四年

觀音經幢 乾甯元年

安定縣陀羅尼幢三紙 外題曰熙甯實無年跋

陀羅尼幢 無年月有李得淵題名

陀羅尼幢 歲次丁亥馬霜撰文

慈恩寺塔內初枕下陀羅尼幢 大朝丙午歲

開福禪寺陀羅尼幢 淳化元年

陀羅尼幢 大宋辛巳歲

宣城陀羅尼 紹聖三年

王十一等建陀羅尼幢 皇慶二年

真性大師開公塔幢 大德二年 二紙梵書

廿八日昨文林閣帖賈送來經幢十餘種選留四種及挑燈細
視亦皆篋中所有惟沂州一殘幢余舊藏亦不全或可冀延
津之合耳又得隋安善君碑龍華寺碑唐法琬碑晉祠銘孟
再榮造象多寶塔銘褚書千文殘石宣城縣尉李府君夫人
賈氏墓志榮王府長史程公墓志宋安平縣君崔氏墓志
三十日車銘碑日後附家刻先生自書也余酷嗜先生書因錄

其目

廣東學政題名記

遂溪學記

初刻九曜石歌

後九曜石歌

募米藥洲字

藥洲二字八分題刻

愛蓮說

別石植蓮八分題字

捧石二字

尚有西齋四大字

瓊州府學碑

魏公遺墨四字

題張魏公詩刻

葦齋詩

墨林二字額

試院用程江二字詩刻

篤志堂額

英佑將軍江公祠壁記有先

後二刻

摹東坡清遠峽字

王文成公客座私祝

補蘇金剛經

墨池記

何子山先生詩

曹慕堂傳

王秋坪藏蘭亭摹本

單素南墓志銘

禪關二大字

禪關跋

青原和黃詩

摹石鏡溪字

石鏡溪記

摹詩境字

率更令車駕帖

摹米題李北海東林寺碑

摹義門望溪手札

補刻七佛偈後題字

庾樓歌

東軒記

兕觥歸趙歌又七律四首

撫州唐鐘歌

芸素二字額八分

盱江書院詩又額四字

飛泉亭觀瀑詩

書原道後

八境臺額

淨因二字額 又嵐漪 研經 東軒 均二字額

訂古存真額 春暉橋三字

滕王閣序 小石帆亭四字額 又小石帆

三字額 小滄浪記

校經義攷之齋六字額 石帆二字

鄭司農象 北海書院詩

城武廟堂碑張壽碑跋 十三行

祭姪帖 連陳深及至治三年陳繹曾跋

古槐歌 古槐記

摹寶藏二大字 題北齊天統三年造象記詩

中嶽太室陽城 佛公祠碑

東軒集蘇聯

天下幾人學杜甫
當時四海一子由

江西重書汪棣園院廡對

國無文字休言命
我有兒孫要讀書

又濟南使院
重書

黃孺人傳

魯貢雙玉歌

詩臆說

綠景山房刻玉枕十三行

綠景山房刻碑塔銘

姜星六刻姜白石蘭亭

石經 又舊刻大字石經

化度寺碑

補韓勅碑項伯修字

補摹淳化帖三行

摹東坡定惠院詩

補張遷碑東里潤色四字

陳無軒讀書牀詩

漫園二大字

張晴溪墓志

柴恭人墓志

張退園墓志

謝去浮墓志

謝母王太恭人墓志

陳月溪墓志

王勤齋墓志

孔莊谷墓志

彭水南暨張夫人合葬墓志

邱木亭墓志

贈大理寺卿王公神道碑

呂元亮墓志

洪節母傳

趙太守傳

圖裕軒庵地記

汪氏啟淑

御書樓記

陳文勤公濼源門外僧舍題句

重修清華閣記

十二月

初一日益文堂書估持示歷代名賢確論卷中有字二行曰紹興戊辰仲秋七月玉鏡堂刊鏡字缺筆前有至治序孰以為元翻宋刻實則明初本耳索直至二百五十金可云妄矣又云李孟傳本方言有雲間朱氏及橫經閣朱記松江朱文石太史舊藏也又一宋人所刻叢書名儒林警悟共七種中有

石林燕語辨証並為盛伯希祭酒所得

初二日覃谿碑目有雲南石刻一帙以其難得也錄如左

周河東州刺史王仁求碑 聖歷元年 昆陽

萬春山真覺禪寺記 至元六年

大理新修文廟記 至元二十四年 并額

碑陰一紙

聖旨碑 至元三十一年

加號文宣王聖旨碑 至大二年

元世祖平雲南碑 大德八年 并額

大崇聖寺碑銘 泰定二年

增建大圓濟宮記 天歷二年 有陰

晉甯鎮靖明憲夫人忠烈廟記 至正十四年

太守段公大圓濟禪苑常住記 至正甲午

沙觀和尚道行碑 至正丁酉

盛通義眉蘭若記 至正庚子

永嘉真覺大師證道歌 至正甲辰

大理國淵公塔碑銘 天開十六年立 楚州趙佑撰

南詔石城碑 段氏明政三年立

元憲二年碑 內有程文海

南詔德化碑 無年月

大軍將大金告身碑 首云帶段志國無年月即南詔德化碑

元聖旨崇聖寺碑 猪兒年云云

初三日再同見示元泰定本玉篇廣韻廣韻尤精有謝字泚藏書印及謝字圓印石華朱文方印又沈眉史國朝名賢傳鈔

本二冊

初四日鑑清閣帖賈持河閒府至元經幢來索費二十千恐不能得留齋中摩挲數日仍還之耳午後再同約至太和殿觀皇上行納徵禮同車至西長安門逢杜雲帆主事自內出知已訖事遂折回後至琉璃廠集古堂攜歸姜行本碑元郝天挺墓碣銘各一通

初五日黃仲弢太史來述沈子佩言以新出蘇慈誌為偽刻且力辨之昨在集古堂以賤值得南詔德化碑一通喜極今日細視則僅碑陰也又為之悵悵不已

初六日夜閱王劍尊閣真定梁維樞撰蕉林相圖之季父也其書體例倣臨川世說於王文成有証辭

初七日王可莊殿撰沈絮齋觀察夏承之主事先後來談可莊

亦以蘇慈墓志為偽刻言其結體太似歐而刀法太淺又云山西石刻可以代訪

初八日閱盛仲交元牘記鈔本舊為法梧門所藏今歸再同

初九日閱華泉集共二本一嘉靖壬戌司馬魯瞻刻本有劉天民序一國朝康熙中張澄源復刻本嘉慶重修明刻僅詩八卷張刻益以文六卷

初十日閱吳淵穎先生集鈔本先生集門人宋濂所定其子士諤刻之有胡翰劉基胡助三序嘉靖中再刻於祝鑾鑾有序萬曆辛亥九世孫邦彥又即鑾本重刊是本即從萬曆本影寫題曰存心堂集卷端有臣恭靖廷王靖廷鈔書之印靈石王臣恭觀靈石王氏壽椿堂圖書諸朱記

十一日再同從廠肆新得劉子威文集吾吳人也取而閱之錄

扉載閣記一首其藏書處也

十二日偕再同赴麻肆略觀數家再同得嘉靖刻呂氏春秋余得巴郡張一鰐刻國語宋公序補音已散入各條之下據其凡例已有刪削然韋昭注尚無增損且雕印頗精因購歸以解嘲

十三日讀孫百川集萬歷中其壻華滋蕃刊於梁溪有鄒近光翁應祥二序共文十卷詩二卷先生富藏書余曾從郡志得卅冊後記一首茲又得博雅堂藏書目錄序一首

十五日再同見示金陵古金石攷目明顧起元泰初輯起自重刻禹南嶽碑迄元而止皆采自前人著錄及方志文集非其目見者唐有王奐之潤州陀羅尼經幢吳金陵延祚寺石經幢南唐瓦官寺經幢

在元崇勝戒壇院之北

衡陽寺石幢保大間棲霞

奇石幢

在山門外山趾見寺志

異日當至石頭訪之然起元自序作於

萬厯庚申已云文之存者累什不獲一石之存者累百不獲

一則居今日而欲言搜羅更難乎其難矣

十六日早晨禁城火初聞為太和殿旋知為茶葉庫既又知為太和門春秋所記雉門兩觀災此其類乎再同因出示宋仁宗洪範政鑒十二卷鈔本云見於宋史藝文志子部五行類別無著錄真秘笈也此書從明緝熙殿本傳錄原本今在臧伯希祭酒處前有海隅朱文長方印內殿寶璽御府圖書大本堂書緝熙殿書藉印方印余欲傳錄而旅次倉卒無寫官因錄其序一首於此

洪範政鑒序

昔者洛書既陳伯禹所以明天道箕疇載演周武所以酌神

猷蓋推本以辨機祥觀變而謹命令是為大法式敘彙倫朕
繼紹慶靈述遵謨訓每置圖而審正必稽古以求端聞或休
嘉之來懼省不類皆異之見微畏厥錄宸宮餘閒記覽史籍
洪範之說緬然可尋而伏鄭所編靡聞全錄歆向作傳散布
羣篇後則京夏諸儒衍繹證北簡牘廣記顛末弗齊不有彙
分何從質信亦嘗取日官之奏合書林之藏參咨廷臣覆究
曩例守厯者有拘牽之累抱繫者有傳致之譏執術末端即
事宰據比令研覈洞見指歸遂采五均六沴前世察候最稽
應者次為十二卷名曰洪範政鑒若語非典要過涉譎怪則
略而不載若占有差別互存考驗則析而詳言咸撫遺聞詎
容曲說舊記皇極之類有日星字祲且辰緯上列渾蓋並施
別為纂脩無取錯糅是雖新意亦有遐矩噫君人者承天子

民倉句九域故必積象數之繁慎消復之宜逆知未萌前慮
諸慝庶乎嗣祖宗之構克保洽平順陰陽之權用弭愆伏則
是書也為政之丕鑒有邦之善經故因題辭兼以自厲龜鑑
斯在淵薄載兢將永通都之傳聊埤廣內之藎云爾康定元
年七月日序

十七日再同詣 乾清門謝 豁免湖廣錢糧恩出內云昨日
之災因值班侍衛不戒於火初由貞度門起延燒貂皮庫再
後及太和門峻閣九楹盡成瓦礫當火熾時屠梅君侍御向
火大哭而某太史逸職名於掌院欲以救火進階人心之不
同如此文林間帖賈以雲門山造象題名三十餘種龍門唐
造象百餘種神通寺造象五種求售諧直不果

十八日至法源寺訪靜涵和尚出虛心圖屬題並觀唐開元石

幢松江楊古醞葆光來拜約明日至樂椿花廠作東坡生日
十九日偕再同赴樂椿花廠古醞已先在再同攜朱滌庵所繪
蘇文忠象設茗果供養又攜明張紳所繪東坡禪隱圖公與
佛印並坐談禪又文徵仲書前赤壁賦徐青藤書後赤壁賦
皆精徐卷有張京江劉石庵二跋又覃溪贈曹儼笙詩卷子
後附論蘇詩若干則曹為覃溪刻蘇詩補注故作此以贈之
也是日同會徐花農太史夏潤之刑部沈吉齋觀察午後至
琉璃廠閱肆惟見明郭聖鵬刻李太白詩楊蕭合注尚精以
闕首冊未購

二十日作洪範政鑑跋一首

廿一日再同出示鮑明遠集明汪士賢校刻後有正德庚午秋
七月延平知府維揚朱應登序云得本於都元敬遂以付刻

汪本蓋又自宋本出嘉慶間周子肅以宋本校袁爽秋薦碑
估秦姓來得隋章仇禹生刻經一通此石在汶上縣之郎廟
極難得

廿二日沈子封來閨元牘記明盛仲交撰舊為法梧門詩龜鈔
本後為劉寬夫先生所得今歸再同江甯金石搜采頗詳擬
錄副本貯之行篋

廿三日作書擬上子壽師並陳吳中利弊事宜凡二十二則
廿四日作七絕三首題靜涵和上虛心圖又補作吳中利弊二
則再同見示撰集百緣經第四一卷吳月支優婆塞支謙譯
共三十六葉每葉十二行行十七字北宋刻梵夾本前題福
州等覺禪院住持傳法沙門普明收印經板頭錢恭為今上
皇帝祝延聖壽闔郡官僚同資祿位雕造大藏印板計五百

餘面時崇甯元年六月日謹卷面金書撰集百緣經卷第四
又圓圈中一經字亦宋人書卷中首尾皆有經字當是千文
編號卷尾有林壽造小墨印前後有鼓山大藏朱文長印

廿五日午後訪鶴巢丈見示所作和白石詞屬為弁言又至琉
璃廠閒肆購高湛墓志一通再同見示邵二泉點易臺卷以
粗絹畫朱絲又破格書之雄渾莽蒼如枯枝百尺刪盡枝葉
又如崩崖墜石巖嵒可怖又朱竹垞手索十餘通合裝一卷
中有小文數首為曝書亭集所未收瞿子玖學士以貽再同
為四十生日壽又日本寫經一卷後有延慶三年尋得一行
延慶彼國花園天王號也

廿六日再同出示通歷一冊唐馬總撰袁氏卧雪廬從徐星伯
本傳錄徐又錄自士禮居目後有星伯先生記云通歷一書

錄自正史其淹貫博瞻固不足以方駕通鑑惟梁武帝通史不傳史鈔之存於今者此書為最古如虞世南略論久已散佚賴此猶存梗概其續編所敘梁唐晉漢周及承襲僭偽事蹟皆依據薛史乾隆中於永樂大典纂輯薛史有數篇全亡無可蒐補者而此書所引各傳完具信有裨於舊籍矣考遼史文學傳蕭韓家奴欲帝知古今成敗譯通歷貞觀政要五代史又列女傳耶律氏讀通歷見前人得失歷能品藻是此書遼時尚盛行今惟士禮居有傳本借抄福佚校其誤字並補目於首道光十三年十二月大興徐松記又上海徐紫珊跋云按舊唐書馬總字會元扶風人歷任方鎮終戶部尚書贈右僕射諡曰懿撰通歷十卷新唐書藝文志郡齋讀書志文獻通攷皆同唯直齋書錄解題作十五卷直齋云五卷為

後人所續當即此本也馬書自太古十七氏迄於隋代纂輯本紀興滅粗述其君賢否而以虞世南所撰略論分系於末以見其義宋孫光憲當撰唐及五代事凡十卷以續馬書太祖以其所紀多不實詔毀之其書不傳此本從黃莞圖士禮居轉錄原缺首三卷道光元年九月徐渭仁記

廿八日至廠肆購交城石壁寺碑一通又宋達金碑六種

廿九日閱七十二峰足徵集葉石君獨居詠懷云獨居固無聊出門亦誰契詩書不療飢難將對徒隸與今夕情形何相似也前在廠肆得明刻國語再同有二本出以對勘再同一本前有嘉靖五年孟冬初吉蘭溪漁石子唐龍序云侍御史郭公自微觀風於秦推其緒於是書而布諸學官後有嘉靖丙戌冬十二月東萊趙仲序又一本無序跋似明初本行款與

嘉靖本同疑即為嘉靖本所自出而本皆附宋公序釋音別刻在後余本則釋音附入當條之下且有刪節非其舊矣再同云黃河合龍已見諭旨憲齋文補河督高陽望江皆開復處分

己丑正月

元日迎喜神方出宣武門

初二日再同見示玩孔經樓所募朱文義器圖取薛尚功鐘鼎款識外加方圓工緻鮮明光彩奪目瑰寶也

初三日偕再同父子同至廠肆火神廟尚未設集在翰文齋得莊刻淮南一部王百穀集一部再同得明成化刻朱晦翁詩文鈔一部前有吾鄉常熟周木序云吳尚書訥所選某君刻於太平學舍又鈔本任川獨學甲午雜詠四冊每卷有謙收

堂藏書記又有金侃亦陶朱記初疑是亦陶先生詩稿既閱
稿中有畫梅詩稱先貞孝及仲父云云又自署名曾以米友
仁元章為比元章友仁為父子則所稱仲父者自當為貞孝
之子攷金貞孝先生長子名遜字祖生仲即亦陶此人稱亦
陶為仲父當為祖生之子惜其餘詩題皆感事咏懷等作無
事跡可攷耳又乾隆三十六年搢紳一部又徐侯齋先生集
一部

初四日燈下作題畫詩八首代張少虞太史仁黼應制

初五日偕再同游廠肆火神廟已設集珠玉書畫羅列頗多古
籍則如廣陵散矣購王文簡公行述一冊

初六日偕再同出前門至關帝廟求籤頗吉旋至廠肆購雷塘
弟子記一部林鹿原樸學齋集一部歸遇盛伯希黃仲弢同

赴市樓小酌伯命言房山之勝雲居寺石刻之多不可不游
又云涿州亦多古刻又云新得一古鏡背有篆書心思美人
無忘大王八字

初七日至廠肆為再同購明會典肆友居奇萬分未能諧直至
鑒清齋購經幢一通北齊造象二通又見程敦泰漢瓦當文
字三冊刻印精好歸次再同見示林鉞漢雋元延祐七年刊
本每卷有東吳鄭鼎校五字

初八日再同見示元刊明修版徐仲車集後附節孝先生語云
五六年前子壽師游廠肆得之今不復有此佳籍矣

初九日萬隱招飲見藝郭言河工稽料每垛實須銀五六百兩
而部中報銷祇準二百四十文以致所報非所銷所銷非所
報可勝浩歎席散至廠肆購經幢七通造象二通夜校還山

遺稿再同所貽

初十日再同見示宋槧本婚禮備用月老新書前集十二卷後集十二卷真奇書也前集卷一文公家禮聖賢訓誡卷二至卷六姓氏源流卷七故事備要門曰前定類媒妁類自媒類擇婦類擇壻類卜相擇婦卜相擇壻不暇擇壻卷八暮婚類女自擇類選名行類選才學類及第後娶類娶後及第類妻門下士類選容儀類師友婚姻類指腹為婚類卷九幼婚類晚娶類姑舅類舅甥類連襟友壻類繼婚類繼室類再醮類聘禮類及時類卷十男女年歲類卷十一合姓類姓氏雙璧凡百有餘聯二百餘事卷十二警語類姻契雙璧凡五十餘聯一百餘事婉淑雙璧凡七聯一十四事後集皆啟狀書劄農工商賈屠沽廝養無一不備舊為延令李氏藏書後歸大

與劉氏君子輒館子壽師為寬夫先生之壻因得此書以異
再同為世守之寶古香古色摩挲不釋為作長歌一首索再
同和

十一日再同見示舊槧新編排韻增廣事類氏族大全共五冊
原書以十干分集今存自己至癸五集而癸集又亡其半每
半葉十七行每行二十八字書中稱宋末人又稱耶律為大
遼定額為大金當是元初人所為為作一跋

十二日乙青來偕往廠肆並約芾卿在翰文齋相見在廠得舍
立齋稿一部趙寒山之父雖明人集不可多得也又見金陵
金石記刻甚精吳墨緒榮性堂詩文集韓是升聽鐘樓集皆
吾鄉先詒論價未成

十四日偕再同至廠肆得鮑子年遺書一部內附劉燕庭海東

金石苑論泉絕句又得宋太平興圖經幢一通

十六日再同贈葉水心文集一部

十七日建霞與卽亭自旱道同進京來云在蘇得元刻小字本
鹽鐵論周香嚴校唐語林有黃苑園跋又云泖生書畫出又
云山左道中所見經幢皆改為珠璣與吾鄉之改錯七如來
佛號同為一厄

十八日建霞在廠肆新得祁刻初印本說文繫傳有苗仙麓手
校數十則在眉端

二十日偕芾卿仲弢夢華同造沈子培昆仲寓觀所藏隋陳茂
碑有趙晉齋藏印孫氏訪碑錄及金石萃編皆據趙氏拓本
著錄而原石之尚在聞喜與否不可知也又觀高植志原石
拓本有名元春者錄田山薑詩於空處大魏神龜四字尚未

全蝕筆力雄厚與翻刻本迥異再同贈有不為齋隨筆二冊
桐城光聰諧律元著子壽師新刻於吳中芾卿贈建崇寺造
象拓本新出甘肅奉安縣彭誦田所貽

廿一日再同見示紫雲增修校正禮部韻略釋疑大興翁氏鈔
本前有桂未谷題字云郭氏校正原自為一書附歐本以行
曹棟亭僅刻歐本而遺郭本是本則以郭之校正闕入韵注
疑坊間所為郭所謂書肆板行一漫則一新必增數注釋易
一標題以快先覩是也四書辨疑云郵字中原韵略訓境上
舍毛晃韻略訓境上行書舍此本郵字與毛訓同亦非禮部
之舊矣庚子重九桂馥記於蘇齋藏本之首又紫雲山民序
前有桂氏黏籤朱筆題云馥案是本見永樂大典原自為一
書附歐陽本以行曹棟亭僅刻歐陽本而未見此本余借翁

覃溪學士影寫元槧本名曰紫雲增修校正禮部韻略釋疑
蓋坊間以郭本竄入歐本者又面葉題云是書名押韻釋疑
不得稱禮部韻略迺歐陽德隆易有開同作亦不得獨歸歐
陽未谷借觀記此卷中有大興劉銓福家世守印專祖齋朱
記案彙在潘氏滂喜齋見元刊本即為此書之祖本惟此書
後仍附郭校正一冊而所校之字原書每韵下又皆附入不
可解潘藏之本則無後一冊也作七律二首題宋刻本撰集
百緣經

廿三日至長椿寺欲訪九蓮菩薩象已不可得訪鴈巢丈以王
幼霞所刻詞見貽首為東坡樂府次稼軒長短句次白石道
人詞次山中白雲詞附陸輔之詞旨次王聖與花外集次易
安漱玉詞次戈順卿所輯詞林正韻

廿六日再同約赴內廷觀

大婚禮黎明至會典館稍憩同

赴

太和殿觀

冊寶復至館夜子刻偕再同及劉伯

泉給諫同至工科朝房坐候至寅刻

皇后鳳輿至儀衛

甚肅寂然無敢譁者返寓天曙矣

廿七日再同贈覃谿瘞鶴銘研拓本

廿九日過廠肆流覽惟見隋孫桃枝造象詣直未成昨建霞云
含英閣有宋石幢一座索直二十金今日再同往視是元祐
年刻予以十金亦不允

三十日再同見示前蜀王錯所書法華經一葉錯字鱣祥為蜀
平章焦弱侯筆乘稱其每趨朝於白藤檐子寫經筆法精謹
韓小亭無事為福齋筆記云予於道光丙午出守潼川知城
外有琴泉寺昔有塔於乾隆年間為雷震圯內貯法華經全

部皆鱣祥所書一時分散恨不見之竭力訪求於老兵家獲數紙以二紙贈寬夫太守寬夫割其半贈劉燕庭方伯予僅存一紙裝裱藏之再同為寬夫先生外孫此經即得自劉氏原裝一立軸寬夫先生題字尚在上方也

二月

初二日碑賈秦君來贈判官堂塑象記幢拓本後周廣順三年造在真定縣又殘經幢二通雖年月已泐尚有題字可攷元祐石幢再同竟自舍英閣擇歸摩挲審視八面皆完好其文有大宋國澠州昌樂縣郭下戶韓琪等題名後二面云以香爐一座施於壽光縣東馬陵村壽聖禪院白佛座前永充供養元祐三年戊辰歲丁丑朔甲申日建立蓋香幢也余所藏香幢至少新年於隸古齋得三通皆澠水郭氏藏石又從文

琳閣得一通亦山左物今此幢既歸再同則余又可得拓本
矣為之欣然再同又得兩宋羣賢小集鈔本微波榭舊藏眉
端有孔蕙谷題字

初三日得芾卿書屬題王文恪斯文贈言卷

初四日赴廠肆購婁子柔吳歛小草一部張武咸二酉堂叢書
一部潘刻古泉叢詒一冊前附沙南侯獲碑雙鉤本

初六日夜間李竹懶六研齋筆記

初七日讀紫桃軒雜綴亦李君實著

初八日廉生再同公請李仲約少詹汪柳門侍郎招往作陪諸
名流畢集席設諫州堂楊忠愍之舊第也公勅相嵩疏諫馬
市疏及獄中遺屬皆刻石陷壁間二疏手稿張辛受之所刻
刻成而卒歿何子貞先生為作傳亦刻石席散至翰文齋攜

歸新翻繆刻李太白集一部又苔岑集一部皆吾郡道光間人其姓名半已闕如吾不收更無收之者矣

初九日讀李易安金石錄後序此才乃在中輟天下鬚眉當泚然汗下佩珍齋帖賈秦君將赴山左訪拓石刻來告別因寫一碑目與之屬以物色王原生太史贈木皮子一冊崇禎間賈虎西撰碑詞也歷代帝王雖免舜禹湯無不經其掎擊譏周文武尤不堪其論今古世道拾以八字曰直死歪生欺軟怕硬一箇大戲場被他勘破可畏哉可畏哉

十一日偕再同至廐肆在古錢劉鋪購唐封祀壇碑一冊神龍元年國行貞洋圖頌拓本一通王審知德政碑一通劉肆舊為小錢李所設李善造曆錢在咸豐時鮑子年劉燕庭諸君皆與往還今歿矣劉亦能辨別古泉故人即以古錢劉呼之

夜間聽松樓遺稿餘杭女士陳爾士燁卿所著雖非易安比亦汪無非王照圖傳也

十二日建霞來談云朱子安治中藏有唐荆川所校晉書又有袁村樓書目子安尊人修伯先生日記數冊述所藏所見版本甚詳

十三日再同見示查聲山書琴賦卷汪秋泉書瀚海堂賦卷皆摹趙文敏汪卷索直三十金

十五日再同出示欽仰毛詩圖葉榮木陶詩圖蔣南沙花艸蟲魚圖分裝兩軸設色鮮麗栩栩生動妙品也又蔣礪堂餘慶始基冊公入贊綸扉時得十歲時應童子試卷面浮簽裝冊徵題湯文端曾賓谷英煦齋及吾鄉顧南雅通政皆有詩又青藤山人墨筆花卉卷亂頭麤服自饒神韻又高麗十七家

畫冊紙絹之外有用麻者其國貧故也

十六日再同以明四忠遺墨屬建霞署首四忠者楊忠烈公澧趙忠毅公南星黃忠節公濟耀陳忠裕公子龍也忠毅自書詩稿在削職追賦時作其言沈痛伊鬱不堪卒讀忠烈則與其鄉長官論災救書也

十七日廠肆送來覃谿墨蹟一本前兩葉為喜帖皆書忝姻愚弟翁方綱頓首拜一有敬蓮台命字樣又有封面一居中大書忝春愚弟鹽官翁方綱端肅頓首拜其後四葉一錄漁洋詩餘皆家書及與其女書一通增姓戈云家書中有屬其家合淡菜丸語再同云覃溪常服此丸年至大耋目力不衰能作蠅頭小楷此丸之力也

十八日再同盡出古專造象招德古齋宋某椎拓余因有拓元

權一通其文曰至元二十四年造又有上四二字不知何義
鄭盒丈以好太王碑贈再同而余所作跋一首及釋文仍欲
索歸因與本甫分錄之黃昏始畢

十九日鄭盒丈奉

敕校通鑑輯覽詔偕再同往相助即

聯輿赴之以懋勤殿鈔本對通行刻本頗有異同盡一卷
而畢同校者邵亭鶴巢而丈建霞花農廉生夢花芾卿子培
子封許子源及梁君某子培云新在隸古齋得南詔德化碑
韋皋碑因急偕建霞往訪亦選得韋皋碑一通唐宋碑造象
經幢十餘通

二十日復造鄭盒丈處校通鑑一卷陳冠生殿撰黃仲弢太史
亦來助校鄭盒丈見貽新得口鼎拓本一通出示古銅造象
共數十龕皆六朝唐時物精妙不可思議又見埃及古文其

石在法國巴黎斯城高不可拓以影照法縮於片紙其文有如鳥者有如獸者有如刀者有如弓矢者皆三代以前象形字文云甘肅某地有山穴列石碑數千皆西夏國史即用其國書無能識者余藏西夏國書碑一通據文云名感通寺安國祐民碑張介侯集及鐵橋漫稿皆有跋仲弢云以京錢五千文得吳子苾家金器拓本百餘通

廿二日隸古齋碑賈送來經幢五種皆已得者內會昌間李潛所造一通拓本較精留之以勸後至勤有堂書估送來呂氏春秋一部明張登雲刻前有萬曆己卯沔陽陳文燭序云鳳陽太守得校本於侍御陳公憲使朱公謀刻郡齋卷端有巡按直隸監察御史陳世寶訂正河南按察使僉事朱東光參補題名此本為畢氏靈巖山館校刻時未見因勸再同留之

廿三日得韓幕廬先生有懷堂集一部

廿四日得建寧書坊來秦姚興弘始九年造象一通其末有云爰刻諸石以銘寸心安有六朝人而為此語者贗品無疑矣夜讀有懷堂集有禹鴻臚贖贖圖圖首妙哉言乎惜不令鄭金聞之更惜不令憲齋廉生諸君聞之

廿五日得子培書附來明諸司職掌三冊經廠舊本尚是當時裝訂初流落在崇效寺僧房為子培所見以白金四兩易得之聞再同有鈔本元至治條例彼此借鈔誠合於倦園流通之意又坊來隋殘碑一通僅存十三行行存三字以至九字不等紀年亦泐惟有我大隋之有天下也句知為隋碑耳在定州蘇韓宮

廿七日昨康吉函言楊學使初十日按臨吾郡綏之首列康吉

被擯牢騷殊甚制藝一道江河日下自入都來聞羣公言近
數年中風氣較前為勝此調言也咸同之間文格雖卑靡尚
知有先正理法今則非為牛鬼蛇神即屬如塗塗附紫鳳天
吳顛倒短褐楊梅盧橘穀列釘盤余雖非所好而能掩鼻效
洛中之詠康吉則佩蘭攬茝惟恐其不芳其連蹇不遇也宜
哉

三月

初三日至琉璃廠得瞿文懿公集姚現聞棘門集一部皆吾鄉
先誥也

十七日晨返館知子培昆仲見招午後赴之見文芸閣廷式張
季直濤及閩縣鄭蘇盒席散至會館陶小渚以子春先生所
著祖覈一冊見示藹然仁者之言但不利於巨室耳

廿一日午刻至江蘇館赴馮夢華太史之招見沈子培袁爽秋
荆禮卿張季直禮卿意致議論猶當年也歸後廠肆送來師
山先生集四冊澹生堂鈔本元鄭玉子美著分為二集前一
集題師山先生遺文共五卷後為附錄第二集題師山先生
文集共八卷前有婺源程文及玉自序玉序又稱為餘力稿
首冊有曠翁藏書銘方印每冊首皆有澹生堂經籍記曠翁
手識山陰祁氏藏書之章及禦兒呂氏講習堂經籍圖書諸
印呂晚村與南雷孟舉購祁氏遺書至於絕交此書亦當年
一重公案也又毛刻唐人集四種

實氏聯珠
唐風集

李賀歌詩

前

有玄覽中區印此印為秦西巖物在汲古之前不學者偽託
耳又有張伯顏刻文選索價至七十金

廿二日廠肆送來管子一部無尹知章注審其行款即莫邵亭

經眼錄所稱元明間刻者再同以四金得之

廿四日海棠盛開再同招客賞之見錢念劬學嘉云在甯波編天一閣現存書目已付刻

廿六日建霞來談見示曹刻集韻有大興翁氏石默書樓印覃溪先生物也又明嘉靖刻淮南子三十八卷無高誘注每卷首行題漢太尉祭酒臣許慎記上明後學閩中王鑒太原傅霖蜀雅甘來學重刊後有跋題嘉靖上章攝提格玄月既望後學閩中王鑒書于仕學堂之龍雷窟

廿九日赴芾卿齋見岷懷建霞妻縣張錫恭問遠華亭雷瑄君曜同游法源寺觀唐遼諸石刻又過崇效寺牡丹未放丁香花已盛開讀壁間王仲堪墓志及覃溪丁香花歌寺僧出示青松紅杏圖卷竹垞漁洋首唱自園初至今名流詩詞題名

無數因亦署名其上復登藏經閣徘徊良久芾卿云舊從閣下搜得吳荷辰曹劍泉寫經今已不見想為嗜古者挾而走矣復至琉璃廠於翰文齋見宋刻鄭樵通志有元明補版又至含英閣觀黃小松嵩洛訪碑廿四圖龍門諸龕佛像皆以淡墨襯染而出有已上紙者有持椎者有架梯墮蠟者蹊徑之奇為從來畫家所未有蘇齋每幅皆有題字或古今體詩引首篆書則孫淵如筆也後有梁山舟祁文端何子貞諸先輩題字聞鄭盒尚書許以三百五十金尚未售也建霞又從李書估處取到元刻袖珍小兒方仁齋傷寒直指源流至論皆有溍生丈藏印尚有鈔本甚多芾卿屺懷即聯興往觀余以天色已晚恐城門上鎖即歸

四月

初二日訪建霞晤云見元至正刻玉篇明宣德本廣韻書估以宣字挖改大字充大德本不知宣德下尚有辛亥字大德無辛亥也又見陳仲魚校華陽國志內鈔配兩卷仲魚先生手錄前有王臣恭靖廷印秦中藏書家也

初七日偕渭漁赴琉廠從冷攤得藏天源禪師語錄鑑影澄禪師語錄五臺雅集稿北游牘皆支那本刻甚精又見隋輩賓墓志許以三千丈未允也

初九日會榜揭曉清晨至此懷寓避羈坐甫定而捷音至此懷中第十二名報者譁於門羈愈甚不得已仍返館則報者亦至幸中第八名午後知建霞亦獲雋同人連茹而升足張我軍但如僕者精力銷亡已成弩末且痛我二親之不及見也自幸之餘益動終天之恨

初十日起見金錄王勝之得第二為之狂喜然石麟康甫季直
芸閣渭漁蒲孫皆為遺珠愈向隅矣午後從劉次芳都諫處
詢得余卷與建霞同出第十四房房師周郁齋先生名雲章
閩縣人內閣中書即往投贄師云余卷為鄭奎師取中未及
薦二三場首藝已發刻矣既徧謁四座師及邊潤民師惟高
陽師未見邊座主云丙子江安二省惟余一人為碩果其意
殊不平

十四日覆試案發幸列一等第四名余卷在烏達峯尚書手以
用裨海字指為裨海之誤將加簽矣為翁尚書沮而止

廿四日黎明至西苑門聽宣狀元張建勲廣西臨桂人余列二
甲第二十名紀懷二甲第六名建霞二甲第十三名

廿九日午後建霞來知 朝考已揭曉建霞及紀懷俱一等余

至二鼓後始得信列二等五十四名咫尺蓬山仍為置風引去惟有自訟而已

三十日建霞來知余卷在麟芝盒手未結一籤而置下等寫作之不能勝人可知矣

五月

初三日得西廬書知新得秋盒訪碑圖

初五日再同出示李緯墓志舊拓本劉氏之福堂藏又沈石田文徵仲作雙松圖卷沈卷蒼勁盤鬱文卷峭秀挺特各極其妙石田後錄杜詩一首字體仿黃山谷亦生氣勃勃又汪孟慈江城錄別圖卷有王二波諸家詞又姚石甫序一首極言吾吳財賦之重以陶文毅公改鹽政為不然是時孟慈官戶部故云爾也又汪某鼎枯相卷為唐陶山作曹賓谷孫淵如

王惕夫潘三松諸老輩皆有題詞

初六日至翰林院習禮初定履歷背某人某省進士年若干歲殿試幾甲朝考幾等第幾名茲奉掌院更定某人某省人幾甲進士年若干歲朝考幾等

初七日新進士引見黎明即起赴西苑門恭候至卯刻由內

閣人員帶領入見長跪背履歷畢即出

骨董家持來舊札十餘通中有蔣礪堂相國與韋谿之壻某翰林一書述韋溪身後事甚詳因錄如左

再啟者韋谿師上元前尚寄手示不意竟歸道山以文望壽考而論原無遺憾惟門祚零丁僅遺五齡幼孫殊堪愴惻弟聞信後即具薄賻並將此後每年如何伙助之處屬敝親家吳巢松太史面見如師母詳悉致明嗣京中知好屢有書來

述知分計之函賴巽泉秋農兩公繕寄師櫬暫停萬柳堂巽
泉及諸同人力勸速葬業已擇有吉壤安窆定必非違惟其
家務頗欠清釐聞內政雖係如師母主裁而外間俱係家人
劉安經理劉本院早出身難以倚任從前師在時如傀儡戲
南詞替唱之類一月本有幾次後雖喪次亦復不免四世嫂
光景甚苦其實每月房租不少不知究有若干而經理全未得宜必
須內務交四世嫂經管而外邊換去劉安方可為悠久之計
據弟所聞若此諒屬不虛竊思師門寥落絕無期功強近之
親門下雖多罕肯與聞家事戈姑爺亦未必能不避嫌怨今
幸台旆入都瀛春諒亦同行北上所有師家支持門戶權衡
出入各要務應如何酌定章程可以經久俾小世兄將來讀
書成立接續書香諸仗尊夫人以女代子一力支持庶作中

流砥柱不致江河日下之虞再吾師一生心血全在書籍金石所藏卷軸碑板不少而生平著作已刻及未刊皆有聞此時琉璃廠店戶業經句串零售殊可浩歎望為分別檢點妥貯造冊二本一存尊處一交四世嫂收存每年晒晾一次以免損失行述想無從撰擬不識生前本有自敘年譜之類否弟因外宦遠羈鞭長莫及而心旌搖曳魂夢難安用特縷縷詳陳伏希鑒察而妥籌之微聞下別無可恃也

另有通候訊三幅此係夾

單

此信所指五齡幼孫名顯達甚不肖卑賤遺業為其夫婦蕩盡其婦今尚存年幾八旬孤老無依再同曾請之常熟翁尚書與同人醵資助之每月京錢百餘千文猶不足給揮霍也聞今尚嗜鴉片無事則覓人為葉子戲卑溪先生一女孫為

其所樂幸知其事者為贖歸之

初十日得報知奉旨改為庶吉士午後建霞持來點用全單
江蘇得館選者共九人統計朝殿覆試名次余在十二三
之間竟得不次點用殊為非分外間恐不免浮言然余自榜
發後朝貴之門從不敢輕投一刺在當軸過采虛聲則有之
在余則問心無愧也

十九日再同招游積水潭見瞿子玖前輩貴誥生給諫文小浦
張子弢此懷建霞誥翁出示米南宮三札真蹟

二十日至廠肆瀏覽得古泉匯一部

廿一日夢花弢卿與秋子培昆仲在長春寺招飲見明人所繪
九蓮菩薩象

廿二日翰林院宣麻辰刻至衙門丙戌前輩及諸同年皆集

廿八日在琉璃廠購初渭園吉金所見錄一部張刻鹽鐵論一部
又明嘉靖癸卯郭雲鵬刻李太白集楊蕭注紙墨尚精惜注
有刪節姑從割愛

六月

初一日拜客見陸天池同年鍾岱有金石癖齋中貯唐神龍四
面造象甚精云自龍門移來

初二日得鄭盦師書以克鼎拓本一紙見貽屬為釋文甫展函
建霞來傳示廉生書述師意甚急如不應命以後所索拓本
皆將謝絕遂招西蟲來同釋夜再同置酒小飲出示所藏書
畫余皆已寓目惟劉寬夫先生一門書畫二卷大如牛腰向
所未見也

初四日作克鼎攷

初五日蒲生見示游仙詩四首繫伊善感玉溪之遺音也

十一日周虎如來在橫州學舍重築秦淮海棠花亭並補種海棠以畫卷屬題

十二日至陶然亭諸同年約為平陽師祝壽師謙不敢當反客為主談飲甚懽平陽席間忽提操殺嗟乎僕敢一日忘操殺哉

十三日同房外用者照例公錢設席聚寶堂到者九人劉靜皆熙吉甫熊經仲丁述曾及僕皆主也賓四人李步瀛李嘯溪史惺石黃紹蘇黃君著作等身天算醫學無所不通嘯溪亦能文疏狂不羈間古古一流人也

廿五日鄭金師以克鼎諸家釋文見示又見廉生前輩所上疏稿一請續修四庫全書提要一請以 皇朝諸儒所撰十三

經義疏頒列學官奉 旨俟會典告成後由翰林院再行請
旨一請整飭衍聖公家務並延名師訓迪聞有 廷寄交
山東撫臣矣

廿六日再同建霞新得古幣甚多余索得六品

安陽
縣營

馬

廿九日至陶然亭應建霞之招見楊叔喬文道希黃季度季度
收藏字畫甚富盡攜以來有貫休畫三教同源圖及面壁圖
張南山攷為東坡攜至嶺外雖不可信然必非宋以後物又
陸叔平畫山水立幅及便面王雅宜書宮詞百首仇唐人物
四王山水皆至精邵瓜疇畫山水卷子有覃溪題小楷至二
萬餘字精妙不可思議

三十日得鳳石東借元太祖親征記詢之再同並無是書惟有
黑龍江外紀為何願船舊藏本又得子培東以陽山大雲洞

題名拓本見贈共數十種游粵二載未能訪拓北來轉拜良友之賜且愧且感

七月

初一日覆鳳石前輩書又得其一函以琅邪書院經幢拓本見貽為鵬巢文撰城南拜石詞序

初二日為芾卿跋王文恪斯文贈言卷

初三日午後西齋招飲至則無客無肴無酒坐良久其親弟家送饌來建霞亦至不至如東坡之設晶飯幸矣見所得余州四部稿

初四日碑賈黃某從山左來為余拓得經幢題名甚多

初五日游南河漈觀荷花偕再同聯車出彰義門芾卿夢華爽秋佛青子培先後來泛小艇于中流清風徐來花香襲人致

足樂也午後復游南觀音寺見明刊藏經及 本朝所刻皆
全一碑為成化間姜立綱書

初六日帖估黃某來從得經幢九分及雋修羅碑劉玉墓志隋
陳黑闥造象齊劉僧信造象作諸暨蔡明經經窺序一首代
平陽侍郎

十二日尊漢閣帖賈來購齊朱岱林墓志隋邯鄲縣令蔡府君
妻張夫人墓志唐畢游江墓志潘智昭墓志曹氏譙郡君夫
人墓志范氏女阿九墓志崔文脩墓志

十四日建輟來偕赴廠肆購雅雨堂刻金石錄一部裴岑紀功
碑朱拓一通又龍興寺道德經幢開元二十三年刻有宋端
拱間題字孫趙所未著錄又華陰華岳廟程琳題名記

十五日得子玖學士書見貽瞿忠宣集一部浙刻小學攷一部

鄭氏逸書攷一部

十六日集雅齋碑賈來購唐造玉象銘無紀年有金輪造字又常君靖碑在四川大定又大雲寺崔嶧題名在四川廣元此二種頗難得又唐經幢一通

十七日作五律二首題周虎如海棠亭圖卷

十八日山左黃某送來七日聖山壽寺香幢拓本一通甚剝泐廿二日大拜前輩第一日清晨至庶常館諸同年皆集聯車而出午後過木齋寓出示宋刊論語集解天香書院劉氏刊本廿三日束裝書估送閱抄本稗輟集宋趙萬年撰四庫所未著錄有怡府安樂堂及曹倦圃圖記未能得慙慙再同傳錄一部

廿五日辰刻別再同騎驢出東便門即登車行十餘里微雨午

刻大雨衣淋漓盡濕申刻抵通州宿恆通店屋宇精潔北道
所僅有也

廿六日僱舟赴津已刻解維風水俱順夜至河西務宿舟中無
事讀定庵集古情奇氣洵足睥睨一世余尤愛其雜詩可分
可合似謠似諷讀至迴心盪氣處不自知其淚霑襟也
廿七日風利未刻即抵紫竹林寓佛照樓

八月

初二日黎明登海宴船薄暮啟輪

初五日未刻抵滬住長發棧

十二日沈穀人前輩來精於釋典云莊刻元應音義以慧琳音
義校之知為不全本又云藏有楞嚴經幢唐大中間刻與藏
本不同

十六日午後得家信知叔父汗喘驟逝十四刻駭痛欲絕言旋在即竟不得視其含歛其為慘怛夫何可言因急訪玉山託僱歸舟

十七日夜宿舟中

十八日待潮已刻解維

二十日辰刻抵家叔父已於十六日大歛

九月

初三日作鄭盦師壽序

初五日繆筱珊前輩來云常州范某善訪碑新得南唐井闌在天甯寺側漂陽新出武后時一碑丹陽新出一唐鐘又云在江甯得文登于氏書頗有舊鈔本

十三日作鄭盦師壽序前一首代吳樂山軍門此則自撰也

廿二日訪黼仲暢談索觀袁魯望集至漢貞閣購攝山明徵碑
一通

廿三日叔朋招飲見示石林公孔耳石題名

十月

初十日午後下船泊唯亭

十二日午後到滬寓同慶公棧

十九日夜坐江孚輪船赴江陰

二十日睡黑方達靖江

廿一日清晨渡江而南達江陰黃田港至南菁書院訪筱珊前
輩暢談

廿三日聞江永輪船上駛擬赴江甯小農子泉僱紅船送余過
江復至靖江為余備早餐視余登輪珍重而別意可感也成

刻忽寒顫不可耐繼以灼熱如病瘧狀僕人視余病勢頗重
即勸余就鎮江上岸宿六吉園客棧休息兩日再圖前進
廿五日病稍愈僱一民船赴江甯午後解維

廿九日已刻抵金陵水西門即攜行李進城寓評事街廣聚棧
十一月

初二日出儀鳳門一路松陰竹迳菜園芋區殊饒野趣中途至
靜海寺小憩夜讀士禮居藏書題跋

初四日午後讀淮南本經訓

初五日早晨騎驢訪張廣文頌穆順道至夫子廟狀元境帖肆
流覽無可取者一家有朱拓經幢二種茅山石刻三四種索
值過昂未能得午後頌穆來同出水西門游莫愁湖十年前
曾到此湖山如舊而游客鬻毛斑矣

初六日得經幢朱拓二通墨拓一通年月盡泐一幢列助緣人名有棲霞寺僧某當亦江甯物也又張孝子殘碑曾審言題名顏顥書疊玉二大字皆在句容宋王德神道碑在鍾山清跡寺側午後移寓江甯縣署見春江師及世兄魚堂茂才初八日午後從魚堂借江甯府志閱之金石藝文存佚分明勝於吾郡志

初十日帖賈持梁碑求售打本尚精因購之並得秣陵唐宋石刻數通行篋得此亦聊足解嘲矣

十一日別春江師至下關

十二日午刻太古行上海輪船自鄂下駛即攜行李登船

十三日未刻抵滬寓同慶公客棧

十五日謁南皮制軍與岷懷同見並見梁星澥前輩夜汪幼竹

招飲見吳倉石俊卿工篆隸鐵筆今之丁龍泓也

廿三日夜下舟游武林四鼓開行由輪船拖帶同舟易丞午同年貞都中舊識樊君子相名永徵山陰人亦頗可談翦燭論心尚不寂寞

廿四日半夜過嘉興誦小長蘆罵鴛湖櫂歌秀州風景常作夢游今過其地而不得一擴眼界殊惘然也

廿五日薄暮泊大關乘輿進武林門至開富三橋沈宏遠船行暫卸行李丞午子相亦來同寓即共出晚餐余平生未至杭州丞午汴人更風馬牛不相及子相為導先路如水母之有蝦也

廿六日與丞午約不出拜客先償游願晨起即偕子相同出至佑聖觀復迤邐至清和坊聞聞殷賑與吾郡金昌亭髣髴即

登吳山梵剎琳宮高下連屬在道旁茶寮小憩左錢唐江右
西子湖對面西興諸山亦歷歷在目真勝區也日晡出湧金
門謁金華將軍廟卽至湖濱聞眺夕陽影下不及漾舟中流
與山靈訂約而返

廿七日偕丞午子相入山先出清波門至淨慈寺衲子某能詩
壁間懸藍田叔沈啟南畫雖非真跡亦名筆也行十里許達
天竺法喜寺聞春夏之交香火極盛寒冬闌然正宜吾輩清
游吳越二經幢在下天竺屹然對立孫伯剛著錄云在上天
竺殊誤復有一斷石在村店傍八面有楞亦似經幢惜不及
下輿一摩挲復至靈隱山門內外各有二幢皆完好登冷泉
亭上飛來峯入龍泓青林諸洞宋元題名隱約苔蘚間甚多
至一線天一僧貌極癡為言一榻碑者可使瓊蠟復導觀周

伯溫摩崖石刻時已過午矣余及丞午欲游韜光而與夫言
路尚遠子相亦有倦色因循山麓至岳武穆祠墳前鐵鑄檜
高象皆為村氓擊碎復至行宮觀文瀾閣子相說言俞樓
蔣廬及蔣左諸公祠為湖上最勝地笑而謝之復言之再為
一登俞樓見壁間諸君聯幾滿頌揚先生真不留餘地矣左
祠金碧輝煌必一工程局之幹員為之蘇小墓前有王君成
瑞一聯刻石此君在吾吳虎邱題名將賀方回舊題摩損黃
子壽師揭示嚴禁鼠竄而去浙中大吏亦聞之耶後至平湖
秋月雖頗敗景絕勝徘徊片時許由錢唐門歸
廿九日襍被至子宜齋其寓在鳳山門直街嚴官巷所居一小
樓正倚吳山

十二月

初二日拜客竟日見楊古醞大令龔幼安觀簪幼翁自言會試亦以第八名入彀尚以不入木天為憾昨拜客道訪舊友王君夢薇暢談夢翁以末秩在浙需次不修邊幅致望吏譏然在風塵俗吏中則終不失為巨擘出所著說文佚字輯說兩冊見示聞此間尚有陳君子宣名祖昭亦能詩

初六日游南山以子宣為導先至其齋略坐即同出清波門至靜慈寺見雪舟和尚工六法頗好鑒藏出示南田草衣淡墨樹木六幅筴江上題六君子圖四篆字引首又查二瞻山水立幅皆精禪寮小憩正對慧日峯欲觀司馬溫公摩崖石經未果出門望雷峯塔循山而南盡探石屋烟霞諸勝復沿九溪十八澗至理安寺石屋洞高敞虛明狀如軒榭壁上周鑄羅漢五百十六身皆有船象姓名剝泐無一二存西北有窟

甚深杳刻曰蒼海浮螺烟霞距石屋約二三里有僧舍可憩
洞中刻十八尊者象莊嚴妙好極鬼斧神工之巧又有千官
塔刻南宋諸臣姓名盡剝蝕洞極深處窄僅容身有一僧象
須持炬而後入石乳琤琮承以大甕皆滿出洞觀巖上有林
景度題名南宋乾道七年刻將訪佛手象鼻諸巖訊諸土人
不可得理安在萬峯之中從九溪十八澗迤邐而進幽秀奇
峭不可名狀道傍泉聲淙淙與松聲相唱和塵襟盡滌老僧
煮飯款客佐以霜菰飯罷復循舊路至靜慈寺雪舟滄茗洗
酌相待久矣不可卻復為盡一杯度萬松嶺進鳳山門返寓
是游也南山諸勝已得大概惟以不至水樂洞為憾據雪舟
云即在煙霞嶺下望之可見與夫自不知耳

初八日薄暮獨登雲居山求超然臺聖水寺不可得烟戶萬家

瞭然在目城外西興山色在煙靄杳冥間與江濤相吞吐
初十日徐蕙生祝寧芷二君約游西湖同出湧金門坐湖舫至
三潭印月就彭宮保退省庵小憩復移櫂至岳廟前上酒樓
小酌步入玉泉寺觀五色魚最奇者一尾深碧色 高宗純
皇帝宸翰所稱翡翠魚也後有珠泉以足蹴池旁地即有圓
沫湧起如濺珠然回舟順道至照膽臺訪拓碑人姚文采將
曠黑矣

十一日訪丞午訂行期姚估來為余拓得賈秋壑三生石題名
周伯琦理公巖記

十四日偕子宣昆季至靈隱重訪飛來峰及龍泓青林各洞拓
碑人姚某隨往欲拓摩崖題名一一指示之寺僧增輝殷勤
留飯薄暮進城復至子宣處飯漏下始歸

十五日與丞午同舟回蘇自艮山門出暮泊臨平鎮偕丞午登岸間步聞閭閻盛尚不見有灾象未至鎮里許有石幢高建河干旁一古刹舟人謂即名寶幢寺惜未能登岸一摩挲也十六日已刻至長安鎮過壩未刻至石門灣即泊登岸淪茗自建中坊入接待寺市肆更盛於臨平

十七日午後抵嘉興府入城周覽仍下舟解維薄暮泊王江涇十八日辰刻過平望已刻過八斤未刻至吳江東門泊長橋下偕丞午登垂虹亭煙水渺然木葉盡脫壁間校邠師一碑捫蘇讀之如親聲咳後進城至新建縣署儀門外有元知州哈刺哈孫德政碑又延祐皇慶各一碑又至城隍廟瞻仰遂返舟鄰船來領賑者誦詠 皇仁歡聲雷動

十九日已刻抵蘇州自婁門入泊任蔣橋即返舍丞午即下榻

敬廬

廿六日懸扁痛兩親之不及待也不敢延客惟設家祭而已

練督廬日記鈔卷五

女夫王立勛謹繕印

邑後學潘承鐸謹校

錄督廬日記抄第五冊校勘表

葉次	行次	格次	誤	正	葉次	行次	格次	誤	正
八	一	八	廿	廿	四十五	二	二十三	之	二
十四	五	十三	須	復	又	十三	三	面	画
二十	十	十七	象	(衍文)	又	十四	十九	經	湮
二十九	十二	三六	廣頤	康耘	五十三	九	奉	秦	秦
三十六	十	四	訪	詣	五十一	十八	九	贈	購
四十三	五	十四	復	渡	五十五	四	十五	園	二
四十三	十五	二十一	記	記	五十七	十三	八	云	之
又	十八	二十一	延	通	六十三	十五	二	常	年
又	十九	十三	繫	藥	又	十八	十三	聖山	山聖
四十五	一	六	宋	朱	六十五	一	廿五	(脫君字)	(增君字)

第五冊校表